

نور کی ریشماں

پنجابی نعتیہ قصیدہ

محمد اقبال نجمی

نور کی پرستش

نعتیہ قصیدہ

۱۴۲۸ھ

محمد اقبال نجمی

ایوان حمد و نعت گوجرانوالہ (پاکستان)

نام کتاب : نوری زشماں
 لکھاری : محمد اقبال نجمی
 چھاپن ورہا : ۱۴۲۸ھ
 کنتری : اک ہزار
 ہدیہ : ~~دوپے~~
 چھاپن والے : ایوان حمد و نعت
 ۸۸۔ بی۔ سیٹلائیٹ ٹاؤن گوجرانوالہ
 فون : ۰۵۵-۳۲۵۱۶۰۳

ورتارے

کتاب سرائے۔ الحمد مارکیٹ، غزنی سٹریٹ۔ اردو بازار لاہور

فون۔ ۳۲۰۳۱۸

نعت مرکز۔ المدینہ دارالاشاعت، یوسف مارکیٹ، غزنی سٹریٹ ۸۸۔ اردو بازار لاہور

فون۔ ۳۲۰۶۸۲-۳۲۸۰۱



پیارے آقا

شفیع المذنبین، رحمت اللعالمین، راحت العاشقین

خاتم المرسلین ﷺ

دے حضور ”نوری رشتاں“ داندرانہ

سوہنے ہار سلاماں وانے خدمت وچ سرکاراں
صلوٰ علیہ دا ورد پکاراں لکھ کروڑاں واراں

نوری ریشماں دے سر ناویں

9	نوری ریشماں دی برسات --- محمد اقبال نجمی
11	نوری ریشماں دے نور نظارے --- غلام مصطفیٰ بسمل
19	نوری ریشماں
25	نفس دا حال
28	باغ بہاری
30	عشق
32	سدا جیوندے لوک
34	نور نبیؐ دا سوہنا
37	سوہنا نام نبیؐ دا
43	مٹھی مٹھی یاد نبیؐ دی
45	روشن مکھڑا
47	پیاردیاں انواراں
49	آپ ﷺ آئے تے
51	آپ ﷺ دے آیاں
61	کھڑپیاں گلزاراں
63	مدحت پاک نبیؐ دی
74	مدنی چن سرکاراں
87	درود و سلام
90	جہاد
92	قرآن پاک

95	آل پیاری پاک نبی ﷺ دی
97	اصحاب رسول ﷺ
101	آپ ﷺ دیاں گفتاراں
103	حدیث نبوی (ترجمہ)
112	سوہنے نام نبی ﷺ دے پیارے
133	معجزات
136	سراپا مبارک
144	دید دی تانگھ
146	مکہ پاک
149	مدینہ پاک
155	روضہ پاک
157	مسجد نبوی ﷺ
159	گنبد خضریٰ
161	فاران دے جلوے
163	عمر گزاراں
165	بخشو پیار بہاراں
167	سوہناسفہ
169	ربیع الاوّل
171	پاک نبی سرکاراں ﷺ
173	دعاواں





نوری ریشماں دی برسات

رب سوہنے دا بے انتہا شکر ادا کرنا جہے مینوں ایہ توفیق بخشی پئی نعتیہ قصیدہ ”نوری ریشماں“ لکھ کے آقا سوہنے صلی اللہ علیہ وسلم دے حضور پیش کر سکاں۔ کروڑاں وارد روتے سلام پیارے مدنی آقا صلی اللہ علیہ وسلم دی بارگاہ اقدس وچ جہاں دی نظر سولی ہوئی تے آپ صلی اللہ علیہ وسلم نے ایس اوگن ہار بردے نوں اپنی مدحت لئی قبول کیتا تے ایسراں میں ”نوری ریشماں“ دے سرناویں لکھیا ہو یا نعتیہ قصیدہ آپ صلی اللہ علیہ وسلم دی بارگاہ ناز وچ پیش کرن دے قابل ہو سکیا۔

نعت دے ایہ نوری پھل آقا صلی اللہ علیہ وسلم سوہنے دی بارگاہ وچ پیش کردیاں ہوئیاں میرا دل کائنات دی سبھ توں سوہنی، نورانی، رحمتاں و نڈن والی ہستی دے حضور جھکیا ہو یا اے، اکھاں وچ محبت پاروں موتی ڈگدے پئے نیں۔ سرشاری دی ایس کیفیت نوں لفظاں راہیں بیان کرنا مشکل ہو رہیا اے۔ آقا صلی اللہ علیہ وسلم سوہنے دی محبتاں بھری بارگاہ ولوں ایہ توفیقاں عطا ہون دیاں نیں، مقدر اں دے ستارے چمکدے نیں تے فیر نعت جہے سوہنے پھلاں نال جھولی بھری جاندی اے۔ ”نوری ریشماں“ آقا صلی اللہ علیہ وسلم سوہنے مدنی من ٹھا صلی اللہ علیہ وسلم دی نذر کردیاں ہو یاں تصور وچ سوہنیاں جالیاں سامنے مولجہ پاک تے کھلو کے ہتھ بنھے ہوئے نیں تے ہوٹھاں اُتے مٹھا مٹھا درود تے سلام دانغمہ جاری اے۔ جالیاں وچوں کھنڈ دے نور دی بارش ہو رہی اے۔ غلام اپنے آقا صلی اللہ علیہ وسلم کولوں منگد اجا رہیا اے آقا سوہنے صلی اللہ علیہ وسلم عطا فرماندے جاندے نیں، انج لگدا اے ویلاڑک گیا اے۔ ایہ نورانی تصور میری زندگی دا سرمایہ اے۔ اللہ تعالیٰ اگے دعا اے پئی ایسے سوہنے نور دے ہالے وچ رہندیاں ہو یاں میری حیاتی دا ایہ سفر پورا ہووے۔

نعتیہ قصیدہ لکھن دا شوق بڑے چر دادل وچ، ہمبلیاں ماردا سی خیال سی کہ بھرواں قصیدہ لکھیا جاوے اوڑک ایس سال اوس بارگاہ ولوں نظر سولی ہوئی۔ نعتیہ قصیدہ ”نوری ریشماں“ لکھنا شروع کیتا تے وچ ہو روی گلاں سجھدیاں کنیاں فیر ایسراں ہو یا پئی نعتیہ قصیدہ لکھن دے نال نال قرآنی قصیدہ تے حمدیہ قصیدے دے شعر لکھن دی توفیق مل گئی قرآنی قصیدہ تے حمدیہ قصیدے دا کم کتھے اڑیا اے ایہ گلاں فیر ہون گیاں۔ نعتیہ قصیدہ ”نوری ریشماں“ اللہ سوہنے دی کرم نوازی تے حضور اقدس صلی اللہ علیہ وسلم دی رحمت دے طفیل چھپ کے تہاڈے ہتھاں وچ اے۔ ایہ نورانی قصیدہ لکھدیاں

ہو یاں مینوں کسے حوالے نال کوئی اوکھت نہیں ہوئی بڑے شوق تے محبت نال چالی پنتالی دناں وچ ایہ نعتیہ قصیدہ مکمل ہو گیا۔ مینوں ایہدے مکمل ہون تے جہڑی روحانی خشی تے سرشاری ملی اوہدا بیان لفظاں وچ کرنا مشکل اے دوستاں نوں قصیدے دے کجھ حصے سنائے اوہناں بڑا پسند کیتا، ایسے دوران سراپا مبارک اک نعتیہ محفل وچ پڑھیا جنہوں سن کے محفل وچ آئے ہوئے سامعین بڑے خوش ہوئے تے سارے لوکاں ایس نوں بڑا سراہیا۔ ایہ عوامی کامیابی وی میرے لئی خوشی دا باعث سی۔ قصیدہ مبارک پڑھیاں ہو یاں جے تہاڈیاں اکھاں پیارے آقا ﷺ دی محبت وچ بھج جاؤن تے میں سمجھاں گا میرے لکھن دا حق ادا ہو گیا اے۔ تسیں ایس موقع تے میرے والدین لئی تے نبی رحمت ﷺ دی پوری اُمت واسطے ضرور دعا کریا جے۔ اللہ کریم سانوں سبھناں نوں اپنے حبیب پاک ﷺ دا صدقہ اپنی رحمت دے سایے تھلے رکھے۔ آمین

”نوری ریشماں“ دے لکھن یا چھپن وچ جے کوئی غلطی ہو گئی ہووے تے اللہ کریم سوہنے مدنی پاک دے صدقے اوہ معاف فرمائے۔ میں اپنے اُستاد مکرم پروفیسر محمد اکرم رضا ہوراں داتے اپنے بزرگاں، دوستاں محترم ثاقب عرفانی، محترم سلطان صبروانی، محترم سجاد مرزا، جناب عاطف کمال رانا، ڈاکٹر بشیر عابد، جناب غلام مصطفیٰ بسمل، ڈاکٹر ارشد محمود ناشاد، جناب احسان اللہ طاہر، جناب محمد انور رانا تے جناب امجد شریف دا بڑے محبت نال ذکر کرنا چاہواں گا جنہاں ایس قصیدے نوں سراہیا، اپنی رائے دا اظہار کیتا، ایس دے پروف پڑھے تے مفید مشوریاں نال نوازیا۔

ڈاکٹر بشیر عابد تے غلام مصطفیٰ بسمل ہوراں دا خصوصی شکریہ۔ جناب غلام مصطفیٰ بسمل ہوراں نوری ریشماں بارے اپنے وچار لکھ کے میرا مان ودھایا اوہناں دے اکھر میرے لئی سرمایا نہیں، اوہناں نوری ریشماں دے پروف وی پڑھے تے قیمتی مشورے دتے۔ ڈاکٹر بشیر عابد ہوراں قصیدے دے سارے حصے گوہ نال پڑھے تے قیمتی مشورے دتے۔ پروفیسر محمد اکرم رضا ہوریں وی خصوصی شکریے دے مستحق نیں جنہاں کتاب بارے اپنی قیمتی رائے نال نوازیا۔ کمپوزنگ تے مکھ مہورت بنان وچ سجاد محمود ہوراں خصوصی دلچسپی لئی، میں اوہناں دا وی حد درجے شکر گزار آں۔ میری دعا اے پئی اللہ کریم مینوں تے سارے بزرگاں، دوستاں نوں اپنے گھرتے نبی رحمت ﷺ دی بارگاہ دی حاضری نصیب فرمائے آمین۔

دعاواں دا محتاج

محمد اقبال نجمی

.....☆☆☆.....

”نوری ریشماں“ دے نور نظارے

محمد اقبال نجمی اک اجیہا بھاگاں والا جی اے جہدے دل وچ رب سوہنے دی محبت دا دیوا جگ رہیا اے تے روح وچ مدنی من ٹھاہا ﷺ نال عشق تے ارادت دیاں جگمگاہٹاں دے جلویاں نے اوہناں دی ذات نوں وی رشنا دتا اے۔ دل، روح تے سریر دی تڑپ، درد تے مہجوری دی اگ وچ تپ کے نکھر جاوے دے گن، لیکھاں والیاں دے حصے وچ ای آؤندے نیں۔ ادب محبت دے قرینے دی پہلی پوڑھی اے، ادب دی انتہا درد تے درد دی انتہا عشق دی ابتدا اے، تے عشق دی انتہا اپنی ذات نوں مٹاؤنا، مڈھلی شرط اے۔ سوہنے آقا ﷺ دی محبت دا تقاضہ وی ایہو اے جے اپنے ماں باپ، بہن بھائی، اپنی ذات، اپنی آل اولاد تے مال دولت کولوں ودھ کے اوہناں دی ذات نال پیار کیتا جاوے۔ ایمان دا ایہو درجا حضوری دی پہلی شرط اے۔

محمد اقبال نجمی ہو راں رب سوہنے دی جگنی گا کے حمد چرغاں نال دلاں نوں رُشنا یا، ایس دے نال نال حضور ﷺ دے حضور من موہ نعتاں لکھ کے سلا ماں دے پھل تے دروداں دیاں ڈالیاں وی پیش کیتیاں، ہن اوہناں نعتیہ، قصیدہ، ”نوری ریشماں“ لکھ کے اپنے تریل دھوتے اکھراں نوں حضوری دی لذت توں آشنا کر کے اپنی ذات نوں وی نور پھہاراں نال مہکا لیا اے۔ جس پلے پھل بدھے ہوون آوے باس رومالوں

قصیدہ عربی زبان دا لفظ اے جہدے معنی مدح تے تعریف دے نیں پنجابی شاعری وچ قصیدہ گوئی شخصیات دی تھاں نعت رسول ﷺ دے حوالے نال جڑت رکھدی اے کیوں جے پنجاب دے شاعر کدے وی حکومت تے دربار نال متعلق نہیں رہے اوہناں اپنے سورمیاں دے جس ضرور گائے نیں۔ حضرت کعب بن زہیر، شیخ عبدالقادر جیلانی تے امام بوصیری دے نعتیہ قصیدیاں دے منظوم ترجمے پنجابی زبان وچ ڈھال کے ایس صنف نوں اگانہ ٹورن وچ مدد ملی اے، ویکھیا جاوے تے نعت وی مدح رسول ﷺ دے زمرے وچ آؤندی اے۔ عربی نعتیہ شاعری دا مڈھلا محرک وی ایہو اے۔ حضور نبی کریم ﷺ نوں سرتاج الانبیا مٹھنا، اوہناں دے

معجزیاں، غزویاں، حسب نسب، حلم، حکمت تے اخلاق دا چرچا ورگے وشیاں نوں اولیت حاصل رہی، جدوں نعتیہ شاعری عربی توں فارسی تے فیر اُردو، پنجابی وچ لکھی جان لگ پئی، ویلے دے نال نال موضوعات وچ وسعت تے کھلار آؤندا گیا تے نعت مدح توں دکھ ذات تے کائنات تیک اپنے اثرات مرتب کرن لگ پئی، بقول ڈاکٹر آفتاب احمد نقوی۔

”زمانے دے اتار چڑھاؤ تے مقاماں دے بدن نال جدوں آپ ﷺ دی سیرت دے نویں نویں پہلو تے امکان ظاہر ہوئے تے آپ ﷺ دے حوالے نال تہذیبی، سماجی، تمدنی، معاشرتی، معاشی، سیاسی، تاریخی، قومی تے بین الاقوامی سطح تے احساس پروان چڑھیاتے بے انت موضوع نعت وچ داخل ہو گئے تے اج وی ہو رہے نیں تے آون و لے ویلے وی شامل ہوندے رہن گے۔ انج نعت دے مضموناں وچ بے انت رنگارنگی تے تنوع نوں اسانی نال محسوس کیتا جاسکدا اے اے کیوں جے نعت آپ ﷺ دی مدح تے توصیف توں اڈ آپ ﷺ دی ذات مبارک، حیات، غزوات، معجزات، تعلیمات، عادات و معمولات دے ذکر دے نال نال شاعر دیاں شخصی وارداتاں تے کیفیتاں دے بیان دے نال نال قومی تے ملی، مشکلاں تے مصیبتاں دے ذکر تے آفاقی تصورات و نظریات دے ان گنت پہلو نوں سلیقے تے قرینے نال اپنے اندر جذب کر چکیا اے۔ (پنجابی نعت، تحقیق تے تنقیدی جائزہ ص، 27)

انج قصیدیاں دے وچ وی مدح دے نال نال موضوعات وچ وسعت تے کھلار آؤندا گیا۔ عربی قصیدہ چونہ جزاں نال ترتیب پاؤندا اے۔

۱۔ مطلع تے تشبیب ۲۔ گریز ۳۔ مدح ۴۔ مقطع تے دعا

ہر قصیدے دا مدھ تشبیب توں بنھیا جاندا اے، ایس وچ حسن تے عشق دا بیان ملدا اے۔ قصیدے دی نعتیہ، عشقیہ تمہید یعنی تشبیب نے غزل داروہ دھار لیا، ایس توں مگروں شاعر اپنے اصل مضمون گریز و ل و دھدا اے۔ عاشق اپنے ہجر نوں بیان دا، محبوب دے وچھوڑے وچ اوہدیاں نیڑ لیاں وستیاں دے گیڑے کڈھدا اے تے اوہدیاں گلیاں دے نال نال او تھوں دے ذریاں نوں وی احترام دا درجا دیندا اے کیوں جے اوس تھاں تے محبوب دیاں تلیاں لکیاں ہوندىاں نیں۔ نعتیہ قصیدیاں وچ وی شاعر حضور ﷺ دی نسبت پاروں مدینے دیاں گلیاں، بازار تے او تھوں دے ذرے ذرے نال سانجھ درساکے من دی کلپنا نوں دور کر دے نیں تے انج مدنی

منٹھا صلی اللہ علیہ وسلم نال اپنے عشق نوں بیاندے نیں۔ شاعر تشبیب لکھدیاں لکھدیاں اپنے ممدوح دیاں جدوں صفتاں دا اظہار کردا اے تاں اوہدا قلم اپنے ممدوح نال گل بات ٹورن ول ہو جاندا اے۔ ایس مقام تے شاعر اپنے نفس دی مذمت کر کے اپنی ذات دی اصلاح کر کے تشبیب توں گریز ول ودھدا اے۔ تیجی منزل ممدوح دی مدح سرائی توں اگانہ ول پیرپٹی اے چھیکڑی پوڑھی یعنی مقطع تیکر رسائی حاصل ہوندی اے جتھے حضور سرور کائنات صلی اللہ علیہ وسلم دی ذات نوں وسیلہ متھ کے اپنی جھولی نوں پھیلا کے انفرادی تے اجتماعی طور تے دعا منگی جاندی اے۔

قصیدہ بردہ شریف دیاں دس فصلاں تے ذیلی سرناویں اک سوٹھ نیں جدوں کہ محمد اقبال نجمی ہوراں اپنے قصیدے نوں فصلاں یاں ابواباں وچ لکھن دی بجائے 36 جلی سرخیاں دی شکل وچ سرناویں درج کیتے نیں تے حضور صلی اللہ علیہ وسلم دی ولادت توں لے کے اجو کی صدی تیک بن والے سالاں دی نسبت نال 1481 مصرعیاں تے مشتمل ایہ نعتیہ قصیدہ مکمل کیتا اے انج شعراں دی گنتری ست سو چالیس یاں اکتالیس بن دی اے۔ ہن تیک دی معلومات دے مطابق ترجمیاں توں ہٹ کے پنجابی ادب وچ کتابی شکل وچ جہڑے قصیدے ساہنے آئے اوہناں وچ

1- حضور صلی اللہ علیہ وسلم دے حضور، تنویر بخاری 1986ء

2- طلع البدر علینا، سید منصور احمد خالد 2006ء

تے ہتھلا مجموعہ ”نوری ریشماں“ شامل نیں۔ ایس توں وکھ عبدالباسط باسط دے نعتیہ قصیدے جہڑے اوہناں دی نعت دی کتاب جمال ربی جمال تیرا وچ شامل نیں۔ ڈاکٹر شہباز ملک ہوراں دی ترتیب دتی کتابیات جلد اول وچ وی قصیدہ جات (محمد دین مست لہر) قصیدہ رمضان المبارک (عمر دین جوگی) قصیدہ جان (مسلم اویسی) تے قصیدہ الغیاثیہ (غلام محی الدین چشتی) بارے وی دس پائی گئی اے۔

محمد اقبال نجمی ہوراں نعتیہ قصیدے دی بحر میاں محمد بخش (سیف الملوک) والی یعنی ست فعلن رکھی اے تے قصیدے دی اصل ہیئت نوں برقرار رکھدیاں ہو یاں مردف تے غیر مردف ردیفوں ورتوں وچ لیاںدا اے۔ تشبیب والے حصے وچ اوہناں نوری ریشماں دے سرناویں نال رب سچے دی حمد چتر دیاں ہو یاں روشن سیرت والی سرکار دی خدمت وچ سلام پیش کیتا تے فیر آپ صلی اللہ علیہ وسلم دے اصحاب، پنجتن پاک، بطحا دے ذریاں، غار حرا، آپ صلی اللہ علیہ وسلم دے خویش قبیلے،

آپ ﷺ دی بھر جوانی تے آپ ﷺ دے سوہنے ناواں نوں لکھ کے سوتر دی اٹی لے کے قصیدہ نگاراں دی ٹولی وچ اپنے آپ نوں کھلھار کے نفس دے حال دے سرناویں توں تشبیب دا مڈھ بنھیا، ایس قصیدے وچ اوہناں اپنے سچے عاشق ہون دا ثبوت دتا اے۔ مدنی من ٹھاڑا ﷺ دی یاد وچ اوہناں اپنیاں سکاں، سوڑاں، مہجوری، دیدی تا نگھ، من وچ اٹھن والے لبواں نوں اکھرا کھرا وچ دھر کے نمھے نمھے سیک نوں پڑھناراں دے دلاں وچ رکھ دتا اے۔ عشق دی معراج وی منکھ نوں اودوں حاصل ہوندی اے جدوں دھرتی دے چن دی محبت دے سوتے دل وچوں بھٹدے نہیں اتے روح تے سریر ایہناں ”نوری ریشماں“ دے حصار وچ رہندے نیں۔ سوز، گداز، ادب، احترام، نیاز مندی قصیدہ گوئی دے موضوعات وچ شامل نیں، ایہدے نال نال دو جے پیغمبراں نالوں حضور ﷺ دی فضیلت قرآن توں ثابت ہونا، آپ ﷺ دی ذات دا کائنات دی تخلیق دا سبب بننا تے خیر البشر ہون دے نال نال آپ ﷺ دے نور علی نور“ ہون دا بیان وی شامل ہوندا اے۔ نجمی ہوراں ایہناں موضوعات نوں قصیدے وچ بیانیا اے ایس دے نال نال نعت دے مڈھلے محرک حضور ﷺ دی پیاری ذات اوہناں دے سوہنے ناواں، واضحی دے نوری مکھڑے، آپ ﷺ دے دنیا تے تشریف لیاون، آپ ﷺ دے معجزات، غزوات، مکہ معظمہ، مدینہ منورہ، مسجد نبوی، گنبد خضریٰ، فاران دے جلوے، فلسفہ جہاد، آپ ﷺ دی شرافت، شجاعت، خلق عظیم، علم، حکمت، انسانی ہمدردی، وعدے دی پاسداری تے اُمت نال پیارور گے سرناویاں نال اپنیاں نوں یکلیاں سوچاں تے فکراں دے پھل مہکا کے دلاں تے دعاں نوں معطر کیتا اے۔ بعض سرناویاں وچ اوہناں مردف تے غیر مردف ردیفاں راہیں اپنیاں نوری فکراں نوں اکھراں دا روپ دے کے دل دیاں مسکیاں باراں نوں مہکاراں وچ بدل دتا اے۔ غیر مردف ردیف وچ قافیہ دی تنگی پاروں بعض قصیدہ گو شعراں دی عجز بیانی اوہناں نوں تکراری موضوعات نوں دہراون تے مجبور کر دیندی اے، محمد اقبال نجمی ہوراں ایس تھل نوں عبور کرن لکیاں مردف ردیفاں دی ورتوں کر کے نہ تے تکراری موضوعات دی بے بسی دا شکار ہوئے نیں تے نہ ای کسے فنی اوکڑنے اوہناں دے قلم نوں سنگل پائے نیں۔

وگئی لئی کجھ غیر مردف تے مردف ردیف دے شعر پیش کیتے جاندے نیں۔

نوری حرف حکایت لکھنا میرے وس وچ کتھے
من وچ پیار دادیپ جگا کے نعت لکھاں سرکاراں

عاشق پاک نبی دے جہڑے سچا عشق کماندے
دل وچ پیار دے پھل کھڑا کے پاندے باغ بہاراں

شان معراج عطا انج کیتی حیرت وچ خدائی
آپ نوں محرم راز بنا کے کیتیاں رب گفتاراں

آپ مبلغ، مومن کامل، واعظ، صادق، سید
آپ مکرم، آپ مبشر، صاحب وچ سرداراں

آپ ولی نہیں ایسے جہڑے سبھ دی راکھی کر دے
اپنے اک اک اُمتی تائیں رکھدے وچ شماراں

(غیر مردف ردیف)

جان توں ودھ کے پیارا پیارا آپ داناں سرکاراں
تاج شفاعت سوہنا سوہنا آپ داناں سرکاراں

آپ آئے تے پائی رحمت و سیاں دل دیاں باراں
آپ نے آکے وڈی وحدت و سیاں دل دیاں باراں

میں کوچھی ساں روپ چڑھایا مدنی چن سرکاراں
وحدت والا جام پیایا مدنی چن سرکاراں

سبھ تے کیتی سدا سخاوت مدنی چن سرکاراں
ونڈی سبھ وچ پیار دی دولت مدنی چن سرکاراں

لکھدا رہواں میں نعت مقالے اِنجے عمر گزاراں
تکدا رہواں اُس نور دے ہالے اِنجے عمر گزاراں

تھاڈے ناں دی تسبی کردیاں میرا جیون لنگھے
اک اک ساہ اِنج کراں حوالے اِنجے عمر گزاراں

(مردف ردیف)

پنجابی ادب وچ معلوم قصیدیاں وچ محمد اقبال نجمی ہوراں دا قصیدہ ضخامت دے نال نال فنی اعتبار نال وی اپنی اہمیت تے وقعت برقرار رکھدا اے۔ قصیدیاں دے انبر تے حالی اے کوئی کہکشاں نہیں بنی کیوں جے ایہناں دی گنتری تن چار توں نہیں ودھ سکی مگر فنی تے فکری اعتبار نال ویکھیا جاوے تے نجمی ہوراں دے ایس قصیدے ”نوری رشاں“ دے اکھراکھروچ اک نویں کہکشاں جگمگاندی نظر آؤندی اے۔ سوہنے نبی کریم ﷺ نال محبت دا سچا اظہار اوہناں دے سچے پریکی ہون دے نال نال اک سچے مسلمان ہون دی گواہی وی پیش کردا اے۔ رب کریم نے قرآن اندر سورہ الاحزاب دی چھینجی آیت وچ آپ سرکار ﷺ تے درود تے سلام بھیج دیاں ہویاں مومنوں وی حکم دتا۔

”بیشک اللہ تعالیٰ تے اوہدے فرشتے حضور نبی کریم ﷺ تے درود بھیج دے نیں اے ایمان والیو! تسبی وی درود تے سلام بھیجو“

محمد اقبال نجمی ہوراں دروداں تے سلاماں دیاں ڈالیاں پیش کر کے سوہنے آقا ﷺ نال اپنی نسبت جوڑ دیاں ہویاں اپنے ایمان تے وجدان نونوں وی قائم رکھیا تے قصیدہ گوئی وچ نعت دے محتاط رویاں نونوں وی موہرے رکھیا۔ حضور ﷺ نونوں تمام جہاناں واسطے رحمت بنا کے گھلایا گیا۔ جدوں رب سچا اوہناں دی نعت پڑھدا اے تے خاکی لئی بڑا ضروری اے جے نعت لکھن لکھیاں خیالاں، فکراں تے اکھراں وچ وی محتاط رویہ اختیار کرے۔

ہزار بار بشویم دہن ز مشک و گلاب
ہنوز نام تو گفتن کمال بے ادبی است

ایہ بارگاہ محمدی ﷺ اے جتھے

ادب گاہست زیر آسماں از عرش نازک تر
نفس گم کردہ می آید جنید و بایزید اینجا
ایس منزل تے غالب ورگے مہان شاعر داقلم لرز لرز جاندا اے۔
غالب ثنائے خواجہ بہ یزداں گزاشتیم
کہ آں ذات پاک مرتبہ دان محمد است

سرکار دی مدحت سرائی محتاط رویے تے محبت دے تقاضیاں دی منگ کردی اے کیوں جے
ایس درتے فرشتے وی پو لے پیریں آؤندے نیں جنید اتے بایزید ورگے اُچی ساہ نہیں لیندے۔
ساڈے شاعر نے محبت تے احتیاط دے سارے انگاں نوں مکھ رکھ دیاں ہویاں قصیدے دے
سارے لوازمات پورے کیتے نیں۔ قصیدے دے انت وچ نجمی ہوراں مسلم اُمہ نوں درپیش
مسئلیاں، اوکڑاں تے استمداد دی چکی وچ پس کے زوال دے درد سمندر وچ گھرن پاروں
سرکار ﷺ دے حضور ترلے، ہاڑے التجاواں تے دعاواں واسطے اپنی جھولی نوں پھیلا کے لہو دے
اتھروواں نال اکھرا کھرنوں رت بھدیا کردتا اے۔

مکدی گل ایہ محمد اقبال نجمی ہوراں دے نعتیہ قصیدے ”نوری ریشماں“ وچ عشق دا اک بیکراں
جہان سانوں اپنے پورے بانکپن نال نت نویاں انگاں دے لشکارے دیندا سد اے۔ اوہناں
اندر محبت دیاں سکاں دی نویکلتا اک اچھے رنگ وچ دیکھی جاسکدی اے جہدے وچ سانوں
حضور ﷺ دی ذات، صفات تے سہیپے دے بھرویں رنگ دکھالی دیندے نیں اوہناں دے
شعراں وچ من دی ہوک، تانگھ دی کوک بن کے ساہویں آؤندی تے من دیاں رتجھاں دی کلپنا دا
جیوندا جاگد اُروپ بن جاندی اے۔ اکھراں دے ایس چانن وچ تن من نہال ہو کے فکراں دے
انبراں تے آپ دے عشق دیاں تحریراں بن کے جگمگاؤندا اے۔

تھاڈے نال دی تسی آقا ساڈا ورد و وظیفہ

محمد اقبال نجمی ہوراں دے اندراک سچا مومن صوفی تے باصفا مسلمان لکھیا ہو یا اے۔ اوہ

نعتیہ قصیدے دے من موہ شعراں وچ جتھے دربار رسالت ﷺ دے دناں راتاں تے متراں،
 صحابیاں دیاں فکراں نوں الیکدے نیں اوتھے ای اوہناں دے اندر دے ہاڑے تے تاں گھاں وی
 ایہناں شعراں وچ اپنیاں لبو آں بھرے سیک نال اک بھرویں ریت بن کے ساہمنے آؤندیاں
 نیں۔ سوہن سلکھنے، من بھاو نے تے جی جان دے اندر دی آواز ایہ شعر سانوں عشق دے تریں
 دھوتے پھلاں وانگوں اپنیاں مہکاراں دیندے پیار کرن والیاں دے اندر نوں مہکاؤندے نیں۔
 رب سوہنے اگے دعا اے پئی جسراں حضرت امام شرف الدین البوصیری دے قصیدہ
 بردہ شریف نے بارگاہ رسالت ﷺ وچ منظوری پائی تے اوہدی فکری فنی عظمت اج تیک دلاں
 دے زنگ لاه رہی اے ایس نوری قصیدے نوں وی حضور ﷺ دی منظوری نصیب ہووے تے
 دل والیاں لئی ایہ نور پھہاراں پیار و وظیفہ بن جاوے۔ آمین

غلام مصطفیٰ البسمل

.....☆.....☆.....

بِسْمِ اللّٰهِ الرَّحْمٰنِ الرَّحِیْمِ

نوری رشماں

نعتیہ قصیدہ



پہلاں سبھ توں نال ادب دے رب دی حمد چتاراں
فر میں نعت نبیؐ دی لکھاں اپنا آپ نکھاراں

آپؐ دی روشن سیرت والے رنگاں دے وچ رنگ کے
منزل دے ول ٹردا جاواں اپنے بخت سنواراں

لکھاں وار سلام میں بھیجاں آپؐ دی خدمت اندر
جپ کے آپؐ دا نام وظیفہ اپنا سینہ ٹھاراں

سوہنے مدنی ماہی توں میں جاواں صدقے واری
جس دے آؤن دا صدقہ ملیاں ایہ سبھ نور انواراں

خدمت دے وچ آقا دی میں نور درودی گھل کے
کر لاں سینہ نور خزینہ پاواں نت بہاراں

پیار سلامی اوہناں دے لئی پھل جہاں نے کیتی
جہاں آپ دا ساتھ نبھایا جھلے دکھ ہزاراں

آل نبی دے نال میں اپنی چاہت سانجھی کر کے
اپنی سوجھ فکر نوں دیواں سوہنیاں نور پھہاراں

پنجتن دا میں پیار وسا کے اپنے ساہواں اندر
اپنی روح دی کیاری تائیں کر دیواں گلزاراں

پاک اصحاب دے قدام دی میں مٹی چم چم چم چم
 جہاں نوں چکایا میرے مدنی چن سرکاراں

بٹھا دے ہر ذرے نال آں عشق میں اس لئی کردا
 سوہنے آقا اوس فضا وچ آپ دیاں مہکاراں

بھاگاں والا گھر اوہ سارا ، سوہنا پاک قبیلہ
 آپ دا پیارا بچپن گذریا جہدیاں وچ بہاراں

پتھر ٹیلے غار اوہ سوہنے آپ دا کلمہ پڑھدے
 دیکھن ، جھومن ، روون وانگوں آپ دے خدمت گاراں

آپ دی پاک جوانی سوہنی ، پیار سہپن سوہنا
 سوہنا مکہ شہر نبی دا ونڈے شان وقاراں

سوہنا آپؐ دا خویش قبیلہ ، سوہنے سنگھی ساتھی
سوہنی بی بی پاکؑ ملی جس دتیاں چین قراراں

غار حرا دا کیہ پچھدے او جس دے اُتے اُترے
نوری اسم اوہ سارے جہاں ونڈیاں نوری دھاراں

نوری حرف حکایت لکھنا میرے وس وچ کتھے
من وچ پیار دا دیپ جگا کے نعت لکھاں سرکاراں

میں تے آپؐ دا اسم الاواں امرت رس ایہ پیواں
ایس بہانے چمکن دم دم میرے دل دیاں تاراں

میں ایہ چاہواں آپؐ دا مینوں بردہ سارے آکھن
میرے سرتے بنھ دیو آقا پیار دیاں ایہ دستاراں

111324

سوئے لفظاں نال سجائیاں میں ایہ ”نوری ریشماں“
پیش نہیں آقا خدمت دے وچ سوہنیاں نور پھہاراں

پیار محبت ، خشبو ، مہکاں سک دا رنگ چڑھا کے
پیش نہیں آقا خدمت دے وچ پیار دیاں انواراں

نال ادب دے لے کے آیا مدحت دا ایہ تحفہ
پیش نہیں آقا خدمت دے وچ نعت دیاں مہکاراں

ایہناں ولس نظر سولی پاؤ مان ودھاؤ
جدھر جاؤن ، دل نوں بھاؤن ، بخشو شان وقاراں

اوگن ہار اس بردے تے وی پیار دی بدلی چھائے
نور شفاعت بخشو اس نوں دیو لطف دیداراں

”نوری ریشماں“ دے سرناویں لکھیا نعت قصیدہ
اس تھیں نور شفاعت پا کے اپنے بخت سنواراں

میں سوتر دی ائی لے کے لگا وچ قطارے
پاک نبی دی شان کیہ لکھنی میں جے اوگن ہاراں

ٹٹے پھٹے حرفاں تائیں جوڑ کے خوش پیا ہوواں
خورے کوئی مل پا دیون پاک نبی سرکاراں

سوہنے آقا سبامنے تہاڑے نفس دا حال کیہ دساں
دنیا مگر نسائے مینوں رکھے وچ آزاراں



نفس دا حال

نفس دا حال کیہ دساں جو اے بھریا نال شراراں
 کیتے جس نے کاج نکمے جھڑا وچ بیماراں

اگلی منزل نیڑے آئی عمل نہ کوئی وی پلے
 نفس پلپت پیا کردا دیکھو کسراں اے یلغاراں

عملاں باجھ خواری لبھنی کدی نہ ایہ گل سوچی
 کدے نہ کیتا جتن کوئی پئی اپنے بخت سنواراں

تیرے نفس نے دتے تینوں کنے زہر پیالے
 ایہدے پچھے لگ کے گل وچ توں پائیاں نیں ہاراں

اپنے نفس نوں پاک کرن لئی تیتھوں کجھ نہ سریا
توں ابلیس دے پچھے لگ کے کھویاں شان وقاراں

تینوں خوب دھیانے لایا نفس دے مکراں پھندیاں
ہور کسے دی گل سنی نہ سنیاں پیار پکاراں

کنا ہور توں خوار اے ہونا چھٹے کے سدھیاں راہواں
کد تک دے کے رکھیاں انج ای نفس دے ہتھ مہاراں

کھٹ لے بھاویں کنے اوگن تیرا رَج نہیں ہونا
بھکھی اکھ دے پچھے لگ کے رہنا نال گنواراں

ہن کجھ عمل کما لے چنگے توڑ کے نفس دا پھندا
دھکے دے ابلیس نوں ڈھا دے جھوٹھ دیاں دیواراں

استغفار دا ورد پکا ہن تاں جے جیون بیٹری
نیکی والے بحر اچ ٹھلے پاوے پیار حصاراں

پاک نبیٰ دی مدحت والی تسہی کرنا سکھ لے
اُچے سچے ایس عمل تھیں بخشیاں ملن ہزاراں

پاک نبیٰ دی مدحت کر کے لا توں باغ بہاری
سوہنے پیارے ایس عمل تھیں کھڑدیاں نین گلزاراں



باغ بہاری

چھم چھم نیچیاں وچ چمن دے آکے پیار بہاراں
ککلی پائی رل مل سبھناں پھلاں ، کلیاں ، خاراں

بگنی ، ماہیے ، ڈھولے ، ٹپے ، نال نٹھی دے گایے
جس پاسے وی تکیا اودھر کھڑیاں سن گلزاراں

مستی دے نال جھوم رہیا سی دھرتی دا ہر ذرہ
سج دھج اپنی خوب دکھائی سوہنیاں سبزہ زاراں

لالیاں پھٹیاں ، رونقاں اٹھیاں ہر ہر بستی وچوں
رحمت والے بدل وسے پیٹھیاں دھوڑ غباراں

اپنے دل دی تَس مٹائی نہا کے شجراں حجراں
رحمت کھنڈی چارے پاسے بجھ گئیاں سن ناراں

مُشبو لتھی رحمت نے جد اپنے رنگ چڑھائے
مُشیاں خوب منائیاں سبھے سکیاں تے اغیاراں

عرش تے نوری، فرش تے خاکی، دوویں راضی ہوئے
دنیا اُتے رحمت ونڈن آ گئیاں سرکاراں

سوہنے پاک محمد ﷺ سرور نور دے ہڑ وگائے
مے توحیدی آ ورتائی وچ مکے دیاں باراں

آپُ دا ثانی آپُ دا سایا ویکھن وچ نہ آیا
ہر اک سچے دل نوں موہیا آپُ دیاں گفتاراں

عاشق پاک نبی دے جہڑے سچا عشق کماندے
دل وچ پیار دے پھل کھڑا کے پاندے باغ بہاراں

.....☆.....☆.....

عشق

عشق نبیؐ نون سینے لایئے پائیے باغ بہاراں
صلوٰ علیہ وا ورد پکائیے چگئے پھل مہکاراں

رب دی مرضی اوہو جہڑی اُس سوہنے دی مرضی
ودھ کے سبھ توں آپؐ نون چاہئے تکیے نت گلزاراں

آپؐ دی ذات جہاناں اُتے سوہنی تے من موہنی
آپؐ دے عشق اچ ذات گوائیے چمکن دل دیاں تاراں


جے کر چائیے ہووے کوئی نظر عنایت والی
عشق نون فر ایمان بنائیے روشن کریئے باراں

یاد اُس سوہنے آقا دی ہن ہر پل دل وچ رکھیے
آپ دے عشق اچ جان لٹائیے پائیے شان وقاراں

اوس سخی دیاں سچیاں باتاں اُچیاں شاناں سبھ توں
اُس دے منگتے جے بن جائیے رہیے وچ حصاراں

نہ کوئی آیا نہ کوئی آنا آپ جہیا اس جگ تے
آپ دے عشق اچ جلھی پائیے کھلرن نور پھہاراں

سدا جیوندے لوک اوہ جہڑے آپ دے سچے عاشق
آپ دے اُسوہ پاک تے چلیے رہیے وچ گلزاراں



سدا جیوندے لوک

جہاں کول اے نور ہدایت رہندے وچ گلزاراں
 جہاں اُتے کرم عنایت پاندے نور پھہاراں

وچ دعاواں آپ دا آقا پاک وسیلہ
 جو چکاون اپنی قسمت رہندے وچ حصاراں

اپنی موتے مزدے جانڈے جھوٹھ دے چیلے سارے
 جہاں کول اے آپ دی سیرت پاندے شان وقاراں


آپ نوں اپنا رہبر من کے کملی والے آقا
 جہڑے آپ دی کرن اطاعت روشن کر دے باراں

لے کے تانگھاں دیدیاں تے شوق تھیں قدم اٹھا کے
صلی اللہ وا ورد پکاندے اوہ پاندے مہکاراں

سدھیاں راہواں پا گئے جہاں کلمہ آپ دا پڑھیا
جہاں کول اے آپ دی چاہت بخشیاں پان ہزاراں

آپ دی کملی دا سایا ای چین دلاں نوں بخشے
جہاں پائی آپ دی رحمت پا گئے نور بہاراں

سارے جگ نوں پیا مہکاندا نور نبی دا سوہنا
جہاں کول ایہ سوہنی دولت رہندے وچ گلزاراں



نور نبیؐ دا سوہنا

سارے جگ تے نور نبیؐ دا پاوے پیا جھلکاراں
طیبہ نگری ونڈیاں جانڈیاں پل پل موہ مہکاراں

نور نبیؐ تھیں مولا سائیں عالم کل سجائے
نور نبیؐ دا ونڈیا رب نے اپنے وچ دلداراں

حسن اے جھڑا وچ جہاناں نور نبیؐ دا صدقہ
نور نبیؐ تھیں پائیاں سبھ نے اتھے نور انواراں

ازلاں توں اے چمکن والا آپؐ دا نور نیارا
آپؐ دے سوہنے نور دے صدقے چمکن دل دیاں تاراں

آپؐ نے بخشے دنیا تائیں آ کے نور اُجالے
 جہدا سبھ تھیں چانن ہويا جہدیاں سبھ لشکاراں

ورق ورق قرآن دا آقاؐ آپؐ دا ذکر چتارے
 چھیمے نوری حرفاں تائیں نور دیاں گفتاراں

کتیا اے کردار نوں سوہنا تے گفتار نوں مٹھا
 آپؐ دی سیرت پاک معطر آپؐ دے نور افکاراں

فتنے جال وچھاندے پئے نیں آقاؐ چار پھیرے
 نور تہاڈے پاروں ای سبھ رکنیاں ایہ یلغاراں

ساڈے لئی سبھ لطف لٹائے سوہنے نوری چن نے
 سوہنے نور دے کارن و سدیاں رہن سدا ایہ باراں

ہر شے توں ودھ آقا تہاڈے نور دی دولت بھاری
اس نوں میری جھولی پاؤ ایہو عرض گزاراں

تہاڈے نور وکھائی سانوں راہ شفاعت والی
تہاڈے نور ای حشر اں دے وچ لینیاں ساڈیاں ساراں

سوہنے نور نے بھر دتے نین سبھناں دے ای دامن
سوہنے نور نے روشن کیتیاں ساڈے دل دیاں غاراں

تہاڈے نور دا سوہنا چان جدھر کھنڈا جاوے
اودھر اودھر ہونڈیاں جاوے ویکھیاں باغ بہاراں

سوہنے نور چوں چمکاں مارے سوہنا نام نبی دا
سوہنے نام نوں چپے جد وی خوشیاں ملن ہزاراں

.....☆.....☆.....

سوہنا نام نبیؐ دا

جان توں ودھ کے پیارا پیارا آپؐ دا ناں سرکاراں
تاج شفاعت سوہنا سوہنا آپؐ دا ناں سرکاراں

آپؐ دے ناں دا صدقہ ساڈے عیب نے دھوتے جان دے
کردا سانوں ہریا بھریا آپؐ دا ناں سرکاراں

ساڈی اکھ نوں ٹھنڈ پچاوے دل نوں چین وی بخشے
ساڈی قسمت دے لئی تارا آپؐ دا ناں سرکاراں

آپؐ دا کیتا سوہنے رب نے ایسراں ناں اے اچا
سوہنے کلمے پاک اچ لکھیا آپؐ دا ناں سرکاراں

ہوٹھاں اُتے آ گیا اُس دم صل اللہ دا نغمہ
آپ دے پیاریاں جد وی سنیا آپ دا ناں سرکاراں

اودوں دے ای پھل نکھرے نیں ہر اک ڈال اے لہکی
جد دا ایہناں لینا سکھیا آپ دا ناں سرکاراں

آپ دے ناں تھیں ملیا سبھ نوں نور اے سوہنا پیارا
چمکاں ماردا سبھ نے ڈٹھا آپ دا ناں سرکاراں

مہکاں ونڈ دے اوہو جگ تے پھلاں وانگ نیں ویکھے
نال عقیدت جنہاں چمیا آپ دا ناں سرکاراں



نام نبیؐ دا ساڈے دل نوں دیوے پیار بہاراں
 نام نبیؐ تھیں روشن ہوئیاں ساڈیاں سوچ وچاراں

نام نبیؐ تھیں دل دا موسم ہوئے خوب سہانا
 نام نبیؐ اے مٹھا مٹھا سینہ اس تھیں ٹھاراں

نام نبیؐ تھیں عرش فرش سبھ روشن خوب نہیں ہوئے
 نام نبیؐ دا نور خزانہ ونڈے نور انواراں

نام نبیؐ تھیں جگمگ جگمگ سارے منظر لگدے
 نام نبیؐ دا چپے جے کر روشن ہون افکاراں

ہر اوکڑ ای دور چہ ہوندى خوف دلاں چوں نسدا
 صدق یقین دا بوٹا پنگرے پیٹھن دھوڑ غباراں

وچ جہاناں سبھ توں روشن نام محمد ﷺ پیارا
ایسے سوہنے ناں دا صدقہ وسدیاں دل دیاں باراں

مٹھاتے من ٹھار ایہ ناواں خوب دلاں نوں بھاندا
ایسے ناں نے اوڑک لینا سانوں وچ حصاراں

نام نبیؐ دے نقش مشور ویکھ رہیاں ہر پاسے
نام نبیؐ دے سوہنے منظر، سوہنیاں نیں مہکاراں

نور و نور زمانے نوں اے نام نبیؐ دے کیتا
نام نبیؐ دے سوہنے اکھر ونڈدے نوری دھاراں

ہوٹھاں اُتے پھٹدے رہندے نام نبیؐ دے جھرنے
نام نبیؐ دا نور وظیفہ دور کرے آزاراں

میرے گھر اچ عشق نبیٰ دا چانن کھنڈے کھلرے
 نام نبیٰ تھیں ہر پاسے ای پھیلن نور پھہاراں

پلکاں اُتے پیار نبیٰ تھیں موتی رہندے چھلکے
 نام نبیٰ تھیں بھاگ جگاواں اکھیاں نوں میں ٹھاراں

سوہنے لفظاں نال بناواں نعت نبیٰ دے گجرے
 نال عقیدت اوہناں نوں فر چماں میں سرکاراں

نام نبیٰ تھیں صدق صفا دے چشمے دل وچ پھٹدے
 نام نبیٰ تھیں روگ میں کٹاں بیڑی پار اُتاراں

امکاناں دے بوہے سارے ایسے ناں تھیں کھلدے
 ایہ دے نور منارا سبھ لئی ایہدے نال بہاراں


ایسے ناں دے لشکارے نیں ویکھ لو سبھے پاسے
ایہو ناں ای تکیا اے میں اچّا وچ سرداراں

ایہو ناں ای سبھناں دے لئی سوہنیاں چھاواں ونڈدا
ایہو ناں ای آگو سبھ دا اچّا وچ درباراں

نام نبیٰ دا چپیا اے جد مذحت دے در کھلے
نام نبیٰ نے آ ورتائیاں نور نبیٰ دیاں دھاراں

نام نبیٰ دا ساہویں رکھیے ایہ وے پاک وظیفہ
نام نبیٰ نے چمکائیاں نیں ساڈے دل دیاں تاراں

نام نبیٰ دا جد وی لئیے یاد نبیٰ دی آوے
مٹھی مٹھی یاد نبیٰ وچ صبح و شام گزاراں



مٹھی مٹھی یاد نبی دی

یاد نبی نے چائن بخشیا کھڑیاں سوچ وچاراں
دل وستی وچ ایہدے تائیں لائے رنگ بہاراں

رہی نہ حاجت دارو دی تے نہ ای لوڑ طبپیاں
یاد نبی تھیں راحت پائی ورہیاں دے بیماراں

دل دی کالک دھوتی جہاں آپ دا دامن پھڑیا
یاد نبی نے چت ایچ بدلیاں متھے لکھیاں ہاراں

آپ دی یاد توں غافل ہویاں بھیڑی حالت ہوئی
کول نیں جذبے سیتل سیتل زنگ لکھیاں تلواراں

یاد نبیٰ ایمان ودھاندى دل نون نور تھیں بھردی
یاد نبیٰ وچ مونیں جہڑے پاندے پھل مہکاراں

یاد نبیٰ دے پھل سوہنے وی رکھدے شان نرالی
ایہناں تائیں جد وی چھیے کھڑدیاں نیں گلزاراں

یاد نبیٰ دی جہاں کول مائے جگمگ جگمگ کردے
یاد نبیٰ دی سینے لا کے اپنے بخت سنواراں

یاد نبیٰ دی عشق دی ٹیسی اُج مقام اپڑاوے
یاد نبیٰ دی پیار دا تحفہ دیوے دید بہاراں

روشن مکھڑا آپ دا پیارا وچ خواہاں دے ویکھاں
یاد نبیٰ دی پاک وظیفہ بخشے نور پھہاراں

.....☆.....☆.....

روشن مکھڑا

نور دا پیکر روشن مکھڑا اُچّا وچ سرداراں
دل دا محور روشن مکھڑا لیندا سبھ دیاں ساراں

جس دی دید لئی پل پل ترسے ویکھاں دنیا ساری
پاک معطر روشن مکھڑا ونڈے پیار بہاراں

ساڈے سبھ دے ستے بھاگ جگاوں والا جہڑا
نور مبشر روشن مکھڑا سوہنا وچ گلزاراں

چین دلاں دا بن کے آیا ملجا ماویٰ ساڈا
مہر منور روشن مکھڑا پاوے نور پھہاراں

روشن مکھڑے دنیا اُتے آ کے نور چہ ونڈیا
سبھ دا ناصر روشن مکھڑا رکھدا وچ حصاراں


خلق دی خشبو ہر تھاں ونڈے رحمت راحت بخشنے
شان مدثر روشن مکھڑا سوہنے نقش نگاراں

ساڈا سبھ دا سچا ہادی ، مکی ، مدنی ، ماہی
اکمل رہبر روشن مکھڑا ونڈا جو دستاراں

جہدے ہتھ اے سبھ مختاری سیرت جہدی پیاری
شافع محشر روشن مکھڑا دیندا شان وقاراں

اُمی داعی ، ہادی ، حامی ، عاقب ، شاہد ، حاشر
برتر بہتر روشن مکھڑا خوشیاں دوے ہزاراں

رحمت بن کے آیا ، سبھ نوں راحت دیون والا
مشفق ، مظہر روشن مکھڑا ونڈے پیار انواراں



پیار دیاں انواراں

آپؐ نے آقا جدوں دکھائیاں پیار دیاں انواراں
خوش بختاں نے جھولی پائیاں پیار دیاں انواراں

آپؐ دے ساہویں بیٹھ کے سبھ نے آپؐ نوں رج رج تکیا
دل دیاں اکھیاں وچ وسائیاں پیار دیاں انواراں

آپؐ دا ذکر کراں تے میری رہندی اے روح زندہ
آپؐ دی مدحت تھیں مہکائیاں پیار دیاں انواراں

آپؐ دے سبھ صحابہؓ چمکن جیویں روشن تارے
آپؐ دا نور ہدایت سائیاں پیار دیاں انواراں

تن سو تیرہ مومنؑ نکلے جوش ایمانی لے کے
اوہناں اُتے رب نورسائیاں پیار دیاں انواراں

ساڈے اُتے انج حضوروں کرم دی بارش ہوئی
ساڈے لئی جا رب توں پائیاں پیار دیاں انواراں

شام عمر دی ڈھل چلی اے پیارے مدنی ماہی
اک واری فر بخشو سائیاں پیار دیاں انواراں

تحفہ ہار دروداں دا میں لے کے آیا آقا
میرے اُتے ہون سوائیاں پیار دیاں انواراں

آپؐ آئے تے بخشش والا سانوں مان اے ملیا
آپؐ دے آیاں جھولی پائیاں پیار دیاں انواراں

.....☆.....☆.....

آپ آئے تے

آپ آئے تے پائی رحمت وسیاں دل دیاں باراں
آپ نے آ کے ونڈی وحدت وسیاں دل دیاں باراں

با ادباں نوں ملیاں تھاواں آپ دی بیٹھک اندر
با ادباں نوں مل گئی چاہت وسیاں دل دیاں باراں

صدق صفا دیاں مہکاں ونڈیاں آپ نے دنیا اُتے
پا کے آپ دی پیاری صحبت وسیاں دل دیاں باراں

دنیا سی اک تپدا صحرا آپ نے کرم کمائے
دتی آپ نے سوہنی سیرت وسیاں دل دیاں باراں

مینوں ناز اے پاک محمد ﷺ میرے آقا مولاً
آپ دے آیاں چمکی قسمت وسیاں دل دیاں باراں

ہر پاسے ای پھیلے سوہنے آپ دے نوری جلوے
پائی آپ دی پیاری سیرت وسیاں دل دیاں باراں

پیار دیاں سوغاتاں تائیں لوکاں دامن بھر لئے
آپ نے ونڈیا نور شفاعت وسیاں دل دیاں باراں

آپ دے آیاں کھلے ہر تھاں نور ایمان دے جلوے
دور چہ ہو یا شرک جہالت وسیاں دل دیاں باراں

آپ آئے تے انساناں نے اپنی ذات پچھانی
پھر گئی سبھ دے دل دی رنگت وسیاں دل دیاں باراں

آپ دی چاہت دور چہ کیتے سبھ دی روح دے جالے
سبھ نے پائی عزت عظمت وسیاں دل دیاں باراں

آپ دے آیاں پھیلے ہر تھاں سوہنے نور سویرے
عالم عالم ہو گئی رحمت وسیاں دل دیاں باراں

.....☆.....☆.....

آپ دے آیاں

آپ دے آیاں ڈھے گئیاں سبھ کفر دیاں دیواراں
آپ دے آیاں سبھ پاسے ای ہویاں نور پھہاراں

آپ دے آیاں روشن ہوئیاں ساڈے دل دیاں باراں
آپ دے آیاں رب نے ونڈیاں پیار دیاں انواراں

آپ نے آن وسائی دل وچ نور ایمان دی طاقت
آپ دے آیاں بخشش پائی سبھے اوگن ہاراں

آپ نے پاک قرآن دے راہیں سوہنا چائن ونڈیا
آپ دے آیاں ہر پاسے ای ہوئیاں نور انواراں

آپؑ نے اپنا علم ، حلم اس دنیا وچ ورتایا
آپؑ دے آیاں روشن ہوئیاں سبھ دے دل دیاں تاراں

آپؑ نے دسیا فقر لباده ہر خلعت توں بھارا
آپؑ دے آیاں لے لوکاں پائیاں شان وقاراں

آپؑ دی صورت تکی جنھے آپؑ دے نیڑے ڈھکیا
آپؑ دے آیاں سبھناں تائیں ملیاں باغ بہاراں

چارے پاسے کھنڈیا آقا آپؑ دا سوہنا چانن
آپؑ دے آیاں اس دھرتی بنے کیتیاں ہار سنگھاراں

آپؑ نے دسیا باجھ عمل دے بندہ بے اتبارا
آپؑ نے ونڈیاں آکے سبھ وچ سوہنیاں نور افکاراں

آپُ دا اُسوہ نور دا چشمہ ساڈا کل سرمایا
آپُ دے آیاں ساڈے اُتے وسیاں نوری دھاراں

آپُ نے دسیا ناکارہ اے دولت والا نشہ
آپُ دے آیاں جاگیاں سمھے ستیاں دل دیاں تاراں

آپُ دی نظر سولی پاروں دلاں دی دنیا بدلی
آپُ دے آیاں سمھے پاسے کھڑیاں پیار بہاراں

آپُ دا رنگ ای غالب آیا سمھ رنگاں دے اُتے
آپُ دے آیاں سمھ پاسے ای کھلریاں نہیں مہکاراں

آپُ نے دتی نویں حیاتی مویاں مکیاں تائیں
آپُ دے آیاں سمھناں پاسے ہویاں نور انواراں

کفر مٹایا دنیا اُتوں آپ نے ماتھی بن کے
 آپ دے آیاں سبھ لوکان دے چمکیاں دل دیاں تاراں

میرے آقا سبھ دیاں آکے بدلیاں نیں تاثیراں
 آپ دے آیاں ہر پاسے توں دور ہوئیاں اشراراں

وچ کلیسیاں بجھی اگ جد آپ دی آمد ہوئی
 آپ دے آیاں کفر شرک دیاں بجھ گئیاں سبھ ناراں

آپ آئے تے موہنے رب تھیں مڑ کے رشتہ جڑیا
 آپ دے آیاں لوکان دیاں بدلیاں سوچ وچاراں

آپ جہیا انساناں نے پہلاں کدوں سی تکیا
 آپ دے آیاں سبھ پاسے ای چڑھ گئے رنگ اتباراں

آپ دے آیاں رحمت پچی ہر اک دل دی کیاری
 آپ دے آیاں ہر اک دل وچ پیاں ٹھنڈاں ٹھاراں

آپ دے آیاں وچ فضا دے خشبو رچی سوئی
 آپ دے آیاں آپ دیاں ای ہویاں ذکر اذکاراں

آپ نے آکے خوشبو بھریا چانن ای ورتایا
 آپ دے آیاں روشن ہویاں سھے لیل نہاراں

آپ دی ذات ملی تے عالی شان قیادت لبھی
 آپ دے آیاں خوشی منائی سکیاں تے اغیاراں

دھیاں تائیں اُچے رتے آپ نے آن دوائے
 آپ دے آیاں مہراں پایاں پھلاں کلیاں خاراں

آپُ دے آیاں بخشش دا اساں موتی جھولی پایا
 آپُ دے آیاں سنانوں ملیاں مدنی چن سرکاراں

آپُ دے آیاں جگ دیاں سبھے رتاں نکھر گئیاں
 آپُ دے آیاں ہو گئیاں اتھے چھاواں تے چھتاراں

آپُ دے آیاں جھولی دے وچ پے گئے نور سویرے
 آپُ دے آیاں دنیا اُتے چمکے رنگ نگاراں

آپُ دے آیاں دنیا اُتے تھوڑ رہی نہ کوئی
 آپُ دے آیاں ونڈیاں گئیاں پیار دیاں دستاراں

سچ نوں سبھے عزتاں شانناں آپُ نے آ کے دتیاں
 آپُ آئے تے ڈھے گئیاں سبھ جھوٹھ دیاں دیواراں

آپُ دے آیاں مکیاں جگ توں سبھے ای تکراراں
 آپُ دے آیاں ہر پاسے ای کھڑیاں گلزاراں

آپُ دے آیاں جگ دے اُتوں جھوٹھ کھلارا مکیا
 آپُ دے آیاں سبھ پاسے ای کھڑیاں پھل مہکاراں

آپُ دے آیاں سوہنے آقا بھیرا ویلا ثلیا
 آپُ دے آیاں سبھ پاسے ای اتریاں باغ بہاراں

آپُ دے آیاں چارے پاسے سوہنا چانن کھنڈیا
 آپُ دے آیاں سبھ پاسے ای ملیاں نور انواراں

آپُ دے آیاں رحمت والا ہر دروازہ کھلیا
 آپُ دے آیاں کفر دیاں سبھ ڈھے گئیاں دیواراں

آزادی دا نعرہ ایتھے آپ دے آیاں وجیا
آپ دے آیاں کھل گئیاں آزادی لئی منقاراں

کمزوراں بے زوراں تائیں عزم سہارا ملیا
آپ دے آیاں عزت پائی کمزوراں ناداراں

ہر اک آفت دور چہ نہوئی خوف دلاں چوں نسیا
اک اللہ دا پیار وسایا دل دے وچ سرکاراں

آپ نے کیتے ہر پاسے ای نور دے چشمے جاری
علم تے حکمت ونڈی آپ نے چمکیاں دل دیاں تاراں

آپ نے دسیا لوکاں تائیں رب اے کہڑا تہاڈا
آپ نے آ ورتائیاں ایتھے توحیدی افکاراں

پیار سلیقے دنیا نوں سبھ آپ نے ای سکھلائے
 آپ نے ونڈیاں وچ غلاماں عشق دیاں پرکاراں

آپ آئے تے اس دنیا دا چہرہ سوہنا سجیا
 آپ دے آیاں دھرتی اُتے ہونیاں نور پھہاراں

آپ دے آیاں رحمتاں والا ہر تھاں بدّل وسیا
 آپ نے آکے جگ تے ونڈیاں پیار دیاں مہکاراں

پھل نبوت والے آپ نے سبھناں وچ ورتائے
 سبھ دی جھولی پائیاں آپ نے نور دیاں چمکاراں

آپ دے آیاں مولا سوہنے ساڈا شرف ودھایا
 آپ دے آیاں سوہنے آقا روشن ہونیاں باراں

پاک ارواحاں ایہ پھل سوہنے چم چم اکھیں لائے
جگمگ کیتا اوہناں تائیں آپ دیاں جھلکاراں

سجن ساتھی متر پیارے سبھ دا بخت جگایا
سبھناں تائیں نور چہ ونڈیا مدنی جن سرکاراں

ہمیںیاں نوں اُچیاںیاں والے تاج شہانے دتے
آپ نے آکے بخشیاں سبھ نوں دکھریاں شان وقاراں

دل دیاں باراں وسیاں سبھے آپ دے آیاں آقا
آپ نے آچکائیاں سبھے ساڈے دل دیاں باراں

آپ دے آیاں دنیا اُتے رحمت دا مینہ ورھیا
آپ دے آیاں سبھ پاسے ای کھڑ پیاں گلزاراں

.....☆.....☆.....

کھڑپیاں گلزاراں

آپُ آئے تے اس گلشن وچ لتھیاں باغ بہاراں
آپُ دے آیاں سبھ پاسے ای کھڑپیاں گلزاراں

آپُ دے آیاں جگمگ جگمگ سارا منظر ہویا
آپُ دے آیاں سبھ پاسے ای کھڑپیاں گلزاراں

آپُ دے آیاں میرے آقا سوہنے موسم ہوئے
آپُ دے آیاں سبھ پاسے ای کھڑپیاں گلزاراں

آپُ نے نور ہدایت ونڈیا ، روشن عالم ہوئے
آپُ دے آیاں سبھ پاسے ای کھڑپیاں گلزاراں

آپُ دے آیاں کھنگر جئے پل وچ ریشم ہوئے
آپُ دے آیاں سبھ پاسے ای کھڑپیاں گلزاراں

سبھ نبیاں دے میرے آقا آپؐ ای خاتم ہوئے
 آپؐ دے آیاں سبھ پاسے ای کھڑ پیاں گلزاراں

آپؐ دا آکھا منن والے سبھ توں اکرم ہوئے
 آپؐ دے آیاں سبھ پاسے ای کھڑ پیاں گلزاراں

امی بن کے جگ وچ آئے آپؐ معلم ہوئے
 آپؐ دے آیاں سبھ پاسے ای کھڑ پیاں گلزاراں

ملک عرب دے ذرے چمکے اختر انجم ہوئے
 آپؐ دے آیاں سبھ پاسے ای کھڑ پیاں گلزاراں

آپؐ دی مدحت پاروں سبھ نوں عزتاں شانناں
 آپؐ دے آیاں سبھ پاسے ای کھڑ پیاں گلزاراں



مدحت پاک نبی دی

آپؐ دا اُسوہ سامنے رکھیے رہیے وچ حصاراں
جھولی پائیے نور خزانہ چمکن دل دیاں جلالاں

آپؐ دے اُسوہ پاک تے چل کے روح دی بھکھ مٹائیے
رحمت والے بدل وسن مہکن باغ بہاراں

پاک نبیؐ دے کلمے والا دم دم ورد پکائیے
پیار شگوفے پنکرن ہوون ہر پاسے گلزاراں

تقوے دی پنڈ بھاری بھاویں اس نون سرتے چا کئے
جدھر جائیے پیار لٹائیے ونڈیے نور پھہاراں

نور نبیؐ جو سانوں دتا لوکاں تیک اپڑا کے
ایس وسیلے نام لکھائیے آپ دے خدمت گاراں

پاک نبیؐ دے خلق دی سوہنی سبھ نوں جھلک وکھائیے
نعت نبیؐ دی رل مل گائیے، چمکن دل دیاں باراں

جام محبت والے مٹھے بھر بھر کے ورتائیے
سچے دین دی راہی کریے ونڈیے نور افکاراں

علم تے حکمت والے قصے آؤ فر دہرائیے
علم دی بیٹری شوہ سمندر پائیے بن پتواراں

آؤ آقاؐ مدنی کولوں پیار دی خیر چہ منگیے
طیبہ نگری ولوں پائیے پیار دیاں انواراں

بھل بیٹھے آں درس اوہ جہڑا سبھ نوں یاد کرایئے
تیکے پاک مدینے ولین کھڑکن دل دیاں تاراں

وچ جہالت رہ کے اپنا آپ تباہ نہ کریئے
علم تے حکمت دولت ساڈی کریئے نہ انکاراں

دین دی رسی گھٹ کے پھڑ لاں نعرہ حق دا لاکے
پاک نبیؐ جی ، پاک نبیؐ جی ، کلمہ حق چتاراں

اوہناں لئی لکھ وار سلاماں جہڑے جان توں پیارے
پاک درود دے تحفے بھیجاں لکھ کروڑاں واراں

چم چم اکھیں لایئے ساوے گنبد دی ہریالی
عشق اچ اپنے آپ نوں رنگے پائیئے چین قراراں

پاک نبیٰ دے تائیں دسیے حال ہن اپنا سارا
آؤ کہیے آقا تائیں کرم کرو سرکاراں

آؤ نہیرے دور نسیئے نوری رشاں تائیں
آؤ دل دیاں اکھیاں کھول کے رسیے وچ بیداراں

چاہت والیاں پکیاں مہراں لایئے اپنے دل تے
اوبدے در تے ترلے پائیے وانگوں اوگن ہاراں

عقلاں دے نہ کچھے ٹریئے پنڈھ آسان چہ کریئے
عشق نوں اپنا رہبر متھیے پھریئے عشق مداراں

آقا سوہنے دے در جا کے منگاں دید حضوری
پاک نبیٰ تھیں دل مہجور دا کھول کے حال گذاراں

پوریاں ہوون سبھ دعاواں پاک نبی دے صدقے
پاک نبی دے صدقے ای سبھ سجیاں سر دستاراں

طیبہ ولس نظراں چک کے آؤ ورد پکائیے
آؤ کہیے ہر ویلے ای مدنی چن سرکاراں

آپ دے درتوں منگن لکیاں کدے وی نہ شرمائیے
نال محبت ، عجز دے کہیے بخشو کجھ سرکاراں

آقا کولوں رج رج منگیے پیار ، شفاعت ، چاہت
اوتھوں نور خزینے ملدے سبھ نوں بن مقداراں

اپنے آپ نوں سدا اڈائیے پیار دے انبراں ولس
سوہنے پاک دا ناں ای چپے اپنیاں وچ گفتاراں

رحمت ونڈن والے کولوں رحمت منگیے سارے
پاک درود سوغاتاں گھلیے خدمت وچ سرکاراں

شوق دلاں دے پورے ہوندے اوتھے جا کے سارے
اوتھوں پیار شفاواں پائیاں سبھناں امی بیماراں

پاک نبیٰ جہیا ہور کوئی نہ سوہنا تے من موہنا
رب نے ذکر بلند اے کیتا پاک نبیٰ سرکاراں

آپ دے نام صفاتی پڑھ لو اک توں اک سوایا
وچ قران دے رکھیاں سبھے آپ دیاں انواراں

شان عطا معراج انج کیتی حیرت وچ خدائی
آپ نوں محرم راز بنا کے کیتیاں رب گفتاراں

رب بخشے اوہ جھولی پاوے ونڈی جانڈے سبھ تھیں
آپؐ نین قاسمؐ، رحمت عالمؐ، مدنی چن سرکاراں

ختم نبوت آپؐ تے کیتی سوہنے مولا سائیں
آکھے رب خدائی اپنی پاک حبیبؐ توں واراں

سبھ اعجاز نین آپؐ دے سچے آپؐ جہیا نہ کوئی
آپؐ دے ناویں جند ایہ لاواں سارے بھار اُتاراں

آپؐ بہادرؐ، آپؐ نین عادلؐ، غیب نوں جانن والے
جو قرآن مجید اے دسدا کیویں دلوں وساراں

رحمت والا تاج پوا کے آپؐ نوں گھلیا رب نے
پاک نبیؐ دی آن دے اُتوں جان تے جند میں واراں

شان نبیؐ دے بارے کرئیے کدے تعجب ناہیں
رب ای جانے شان نبیؐ دی رکھدا جو ابصاراں

پاک نبیؐ دا سینیاں اندر آؤ پیار رچائیے
آپؐ دا پیار ای روشن کردا فکراں تے افکاراں

نور نبیؐ دے تائیں کرئیے روشن آل دوالا
نور نبیؐ تھیں روشن کرئیے اپنیاں سوچ وچاراں

آپؐ دی رحمتِ رافت سمجھ لئی گوڑھیاں چھاواں ونڈے
آپؐ دی رحمتِ رافت روکے کفر دیاں یلغاراں

آپؐ دی ذات نوں اشرف متھیے دل دے روگ گوائیے
پیارے آقاؐ سانوں رکھن اپنے وچ دلداراں

آپؑ دا شان بیان نہیں ہونا لکھ میں کرنا چاہواں
 آپؑ دا شان بیان کراں تے اپنا سینہ ٹھاراں

آپؑ محبوب تے محرم رب دے ہور گویڑ کئیہ لانا
 آپؑ دیاں سوہنیاں کر کر گلاں اپنے بخت سنواراں

خلق سمندر آپؑ دا سارے نبیاں نالوں اچا
 مینوں خلق سمندر وچوں دیوہ نور پھہاراں

عظمت آپؑ دی رب ودھائی جہڑا شاناں والا
 آپؑ دا صدقہ سانوں وی تے خیراں ملن ہزاراں

آپؑ دا شان بیان نہیں ہو یا ٹلھ غلاماں لائے
 آپؑ دی عظمت اگے جھکیاں سخن دیاں رفتاراں

کنے لوکاں بحر کھنگالے آپ دی عظمت والے
تھکے ہارے لوک وچارے کردے کیہ اظہاراں

اک اک ناں دی کھوج اچ ڈبے تہ تک جانہ سکے
جبرائیل دی پہنچ توں اُتے آپ دیاں انواراں

آؤ اپنی چاہت تائیں شوق دے پر ہن لا کے
پاک درود وظیفہ کریئے ، پہنچے وچ درباراں

آؤ رب دے پیارے تائیں سارے ترلا پائیے
دل شیشے نوں صاف کرایئے اترن دھوڑ غباراں

آؤ اپنا آل دوالا ایسراں ہن رشنائیے
آؤ میل اوہ لایئے جھڑی لائی اے زرداراں


اوہناں نال تعلق اپنا جیوں جیوں پکیاں ہونا
تیوں تیوں ساڈے دل دے اندر کھڑنیاں نیں گلزاراں

ہور دوارہ کوئی نہیں ایسا پوری کرے جو حاجت
پاک نبی دے پاک دوارے اپنے بخت سنواراں

دل دی تانگھ اے او سے درتے ساہ ایہ پورے ہوں
آقا دل دے اس جذبے نوں رکھو وچ حصاراں

صلیٰ علیٰ دا سوہنا نغمہ سارے رل کے گائیے
آؤ اوس دوارے جا کے منگیے پھل مہکاراں

آپ دے پیار دی تانگھ تمنا دون سوائی ہووے
آپ دے ذکر تھیں راحت پاواں مدنی چن سرکاراں



مدنی چن سرکاراں

میں کوچھی ساں روپ چڑھایا مدنی چن سرکاراں
وحدت والا جام پیایا مدنی چن سرکاراں

سچ دی ڈھال دے نال ای ڈکے جھوٹھ دے سارے حملے
حق دا سورج آ چمکایا مدنی چن سرکاراں

وہماں، خاہشماں، حرصاں، ہوساں روگ سی کنے لگے
دل دا ہر اک روگ مٹایا مدنی چن سرکاراں

جہاں تائیں ننڈیا جگ نے ماڑا جان کے اتھے
اوہناں تائیں گل نال لایا مدنی چن سرکاراں

جنگل ، بیلے، باراں دے وچ آپ دا ناں پیا گونجے
ہر دل اندر پھل کھڑایا مدنی چن سرکاراں

ہر اک قول مبارک آپ دا سورج وانگ اے روشن
بے وصفوں نوں وصف سکھایا مدنی چن سرکاراں

سوہنے آپ دے ناواں اندر ہر اک روگ دا چارہ
ایہناں دا میں ورد پکایا مدنی چن سرکاراں

وہم گماناں اندر لوکی ٹردے پئے سن اتھے
صدق یقین دا دیپ جگایا مدنی چن سرکاراں

آپ دے مٹھڑے بولاں دا سبھ امرت رس نہیں پیندے
دل دا سارا زہر گویا مدنی چن سرکاراں

آپُ دی رحمت پاروں صحرا گلشن دے وچ بدلے
پتھراں نوں وی موم بنایا مدنی چن سرکاراں

”میں“ دی ذات دے پنجرے اندر قیدی سن سبھ اتھے
سبھ نوں جیون ڈھب سکھایا مدنی چن سرکاراں

آپُ دی ہستی مان مئی کمزوراں بے زوراں دا
ماڑیاں تائیں گل نال لایا مدنی چن سرکاراں

آپُ دی سوہنی سیرت دے پھل دنیا تے جو کھلے
اوہناں نے ای جگ مہکایا مدنی چن سرکاراں

سوہنے نور نے ہر پاسے ای اپنیاں رشاں ونڈیاں
عرشاں، فرشاں نوں رشنا یا مدنی چن سرکاراں

ہر مشکل وچ آپ دی رحمت سایا کردی ڈٹھی
جندڑی تھل نوں باغ بنایا مدنی چن سرکاراں

آپ دے ہوٹھاں اُتے آ کے حرف سنہرے ہوئے
معنیاں وی اتبار اے پایا مدنی چن سرکاراں

سوہنے سہج سبھانے ہر اک تلخی نوں کٹ دتا
سم نوں شیریں آپ بنایا مدنی چن سرکاراں

دنیا والے انج لگدا سی تپدے تھل وچ پھردے
آپ دی ذات نے کیتا سایا مدنی چن سرکاراں

اپنے رنگ وچ رنگن دے لئی سبھ اصحاباں تائیں
پگ پگ اپنے سنگ ٹرایا مدنی چن سرکاراں

آپ دے پیار دی جھیل دے اندر جھڑا پھل وی تریا
جھوم جھوم کے اوہ لہرایا مدنی چن سرکاراں

کالی رات کفر دی اندر جھڑے لوک سی ستے
اوہناں تائیں آن جگایا مدنی چن سرکاراں

ویر کماون جھڑے لوکی خیراں اوہ وی پاون
انج دا پیارا سبق پڑھایا مدنی چن سرکاراں

اوہو اج زیارت گاہاں جتھے قدم چہ رکھے
غاراں دا وی شان ودھایا مدنی چن سرکاراں

یاد اچ کملی والے دی ایہ اکھاں جل تھل ہونیاں
ہجر دا بخشیا اے سرمایا مدنی چن سرکاراں

اُمّت دی غم خواری دے لئی اتھر کیر کے اکھیوں
اُمّت دا اے مان ودھایا مدنی چن سرکاراں

سبھ نبیاں دے میرے آقا آپ ای خاتم ہوئے
آپ دا رنگ ای غالب آیا مدنی چن سرکاراں

آپ دے پیار دا صدقہ سانوں ہر شے ایتھے لبھی
نور تھیں دامن پُر فرمایا مدنی چن سرکاراں

اوہنوں نویں حیاتی لبھی اوہو اکرم ہویا
جہڑا پاک دوارے آیا مدنی چن سرکاراں

آپ دے آیاں میرے آقا سوہنے موسم ہوئے
کتیا جگ دا روپ سوایا مدنی چن سرکاراں

آپؐ دا اُمتی بن کے اساں تے سوہنی دولت لبھی
ساڈے دل دا میل گویا مدنی چن سرکاراں

رات دینیں میں کراں وظیفہ آپؐ دے سوہنے ناں دا
آس مری نوں ہے رشنا یا مدنی چن سرکاراں

قول مبارک آپؐ دے سارے سچائی دے زینے
علم خزانہ خوب لٹایا مدنی چن سرکاراں

آپؐ دی رحمت برکت صدقے شہرگراں سبھ وسدے
جگ وچ ہر تھاں چانن لایا مدنی چن سرکاراں

عزت شان ملی اے سانوں آپؐ دی ذات دے پاروں
ڈبدا بیڑا پار لگایا مدنی چن سرکاراں

آپؐ دے درتوں خیراں پاون بھٹکیاں نظراں سبھے
امر شفا دا آ ورتایا مدنی چن سرکاراں

رحمت والے باب چہ کھولے آپؐ نے دھرتی اُتے
ذره ذره خوب سجایا مدنی چن سرکاراں

ازلی نور نے آ کے ونڈیاں ہر تھاں تے رشنائیاں
سوہنے خلق دا مینہ ورسایا مدنی چن سرکاراں

بن کے رہبر آپؐ نے سانوں نور بصیرت دتا
پڑھ کے ربی حکم سنایا مدنی چن سرکاراں

ہر محتاجی دور اے کیتی لطف عطاواں کر کے
جیون وادی پیار وسایا مدنی چن سرکاراں

عرشاں اُتے نقش جمائے آپ دے سوہنے قدماں
اوہنوں اپنا فرش بنایا مدنی چن سرکاراں

دید نبی دی خاطر عرشی صفاں سی بنھ کھلوتے
شان جدوں معراج دا پایا مدنی چن سرکاراں

نعت مبارک جہڑے لکھدے اوہناں تائیں ہتھیں
مدحت والا جام پلایا مدنی چن سرکاراں

بلھاں اُتے آن توں پہلاں پوری کیتی رب نے
ہتھ دعا لئی جدوں اُٹھایا مدنی چن سرکاراں

آپ دا سوہنا اُسوہ ای بس ساڈا کل سرمایا
جس تھیں دل نوں اے رشنا یا مدنی چن سرکاراں

میں آکھاں پئی سبھ لوکاں توں میرے لیکھ نہیں چنگے
میرے من دا شہر وسایا مدنی چن سرکاراں

وگڑے کم سنوارے سارے پاک وسیلے تائیں
دل والا ہر روگ مٹایا مدنی چن سرکاراں

پیار دی سنگھنی چھاں اے کیتی میرے سردے اُتے
ہر خاہش نوں توڑ چڑھایا مدنی چن سرکاراں

آپ دے نور نے دنیا تائیں خشبو بھریا کیتا
وچ دلاں دے نقش جمایا مدنی چن سرکاراں

آپ دی کملی ڈھکدی پئی اے ساڈے عیباں تائیں
نور شفاعت دا ورتایا مدنی چن سرکاراں

رحمت، راحت، عزت، دولت پل پل اوہنے کھٹی
پاک دوارے جہڑا آیا مدنی چن سرکاراں

آپ دے آیاں سانوں رب دی سوہنی ذات چہ لبھی
ساڈا رب نال میل کرایا مدنی چن سرکاراں

جسھاں جیون بیڑے ٹھیلے آپ دی وچ غلامی
اوہناں اپنا شان ودھایا مدنی چن سرکاراں

اپنی جان دے ویریاں دے لئی آپ نے رحمت منگی
اپنا سوہنا شان دکھایا مدنی چن سرکاراں

لات منات دے بتاں تائیں توڑیا اگے ودھ کے
اکو رب دے کچھے لایا مدنی چن سرکاراں

اک دو جے دے خون دے ویری لوکاں تائیں کسراں
بھائی بھائی آن بنایا مدنی چن سرکاراں

جہڑا آپ دے کول آ ڈھکیا اوہو آپ دا ہويا
آپ نے اوس تے کیتا سایا مدنی چن سرکاراں

علم دے پیکر، علم دے مخزن، رحمت دے نیں محور
ہر اک ذرے نوں چکایا مدنی چن سرکاراں

ازلاں توں اے جاری ساری آپ دے نور دا چشمہ
ہر اک جی نے فیض اٹھایا مدنی چن سرکاراں

ذہناں وچوں مفروضے سبھ آپ نے آکے کڈھے
حق سچ دا عرفان کرایا مدنی چن سرکاراں

رگ رگ دے وچ رچیا وسیا آپ دا ناں ای سوہنا
چین دلاں نے جس تھیں پایا مدنی چن سرکاراں

ایہ اعجاز وی آپ دا آقا ساری دنیا من دی
ڈبے سورج نوں پلٹایا مدنی چن سرکاراں

آپ دے سوہن غے دنیا تائیں خوشبو بھریا کیتا
ہر تھاں سوہنا نقش بنایا مدنی چن سرکاراں

بن کے رہبر آپ نے سانوں نور بصیرت دتا
آپ دا مولا شان ودھایا مدنی چن سرکاراں

آپ دے ذات تے آقا سوہنے لکھ کروڑ سلاماں
ہار درودی عرشوں آیا مدنی چن سرکاراں

.....☆.....☆.....

درد و سلام

سوہنے ہار سلاماں والے خدمت وچ سرکاراں
صلوٰ علیہ دا ورد پکاراں لکھ کروڑاں واراں



مدنی خیر اناماں دے لئی سوہنیاں نور پھہاراں
آپ دے سوہنے ناماں دے لئی سوہنیاں نور پھہاراں

طیبہ پاک توں جہڑیاں آون مہکاں ونڈدیاں واواں
اوہناں دے اکراماں دے لئی سوہنیاں نور پھہاراں

طلع البدر علینا جتھے بچیاں سی رل گایا
اوہناں روشن باماں دے لئی سوہنیاں نور پھہاراں

لکھ کروڑ سلام محبت سونہی جالی تائیں
ہادی نور مداں دے لئی سوہنیاں نور پھہاراں

احمد تے محمودؑ ، محمد ﷺ ، طیبؑ ، طاہرؑ ، حامد ﷺ
سوہنے سوہنے ناماں دے لئی سوہنیاں نور پھہاراں

منبر تے محراب اوہ اعلیٰ ، گنبد خضریٰ پیارا
اچے پیار مقاماں دے لئی سوہنیاں نور پھہاراں

روضے پاک نوں چمن آکے جہڑیاں نال محبت
اوہناں فجر اں شاماں دے لئی سوہنیاں نور پھہاراں

اکھیاں دی اوہ ٹھنڈک نالے چین دلاں دا ساڈے
آپ دے سبھ اقداماں دے لئی سوہنیاں نور پھہاراں

آپؐ دے روضہ پاک تے آون پیار سلام وی جنے
 اوہناں پیار سلاماں دے لئی سوہنیاں نور پھہاراں

آپؐ دی بیٹھک اندر بیٹھ کے جہڑے موجاں مانن
 اوہناں لعل بداماں دے لئی سوہنیاں نور پھہاراں

جہڑیاں مُشکاں ونڈیاں جاون آپؐ دے صدقے آقاؐ
 اوہناں مشک مشاماں دے لئی سوہنیاں نور پھہاراں

وچ غلامی رہ کے آپؐ دی سدا جہاد جو کر دے
 اوہناں پاک غلاماں دے لئی سوہنیاں نور پھہاراں



جہاد

سوہنے رب دی یکتائی دیاں بھر کے سبھ انواراں
عشق نبیؐ دا رنگ چڑھا کے لے کے نور پھہاراں

نیکی دے ول ٹردے رہیے نفس تے قابو پا کے
نال برائی لڑدے رہیے رہ کے وچ حصاراں

جہڑی اوکڑ آوے اوہنوں ہس ہس سینے جریئے
شکر گزاریئے سوہنے رب دا پائیئے شان وقاراں

مال متاع اولاد تے جاناں اُس دے ناویں لایئے
ایہدی کجھ تشہیر نہ کریئے وانگوں اوگن ہاراں

اپنے اک اک ساہ دی کرئیے پل پل جے رکھوالی
فیر جہاد اے پورا ہوندا بدن سوچ و چاراں

عالی رتبہ پاون لئی اے کنڈے چگنے پیندے
جہڑے اوہدی راہ تے ٹردے پاون دُکھ ہزاراں

ایویں تے نہیں ایڈی اُچی نور دی نعمت لبھدی
ایویں تے نہیں اوہدے ولوں ملدیاں پیار اتباراں

موہوں اُف نہ کرئیے نجھی رہیے صابر بن کے
مِلدا رتبہ عالی اے فر چمکن دل دیاں تاراں

علم قرآنی پڑھیے جے کر جذبے پکے ہوندے
نور ایہ دل وچ رچ جاوے تے کردا دور آزاراں

.....☆.....☆.....

قرآن پاک

نور صحیفہ نور نون ملیا آئیاں نور بہاراں
نوری لیہنوں لے کے آیا جگمگ ہوئیاں غاراں

ایہ جد نور پہاڑ نے تکیا اوہ وی نوری ہویا
نور ایہ کھنڈیا جتھے جتھے کھڑ پیاں گلزاراں

حرف حرف تے نقطے ایہدے رکھدے شان نرالی
مشرق مغرب روشن کیتے ایہدے نور انواراں

حق تے باطل دوہاں تائیں ایہ وے کھول وکھاندا
رحمت ' راحت وٹڈا پل پل اپنے وچ دلداراں

نال فصاحت نال بلاغت اک اک پارہ بھریا
دور جہالت کیتی جگ توں ایہدے نور افکاراں

لیہنوں اپنی وچ حفاظت مولا سائیں رکھیا
ایہدا ہر اک قول اے فیصل اُچا وچ درباراں

نیکاں پاکاں لوکاں لئی اے خوب ہدایت وٹدا
ایہدے نور نے روشن کیتیاں ساڈے دل دیاں باراں

ایہدے قاری شرفاں والے ' حافظ سوہن سنکھڑے
اس توں راحت ' رحمت پائی عمراں دے بیماراں

ایہ اعجاز اے پاک نبی دا دیندا ایہ تنویراں
ایہدی حکمت نال ای چمکن سبھ دے دل دیاں تاراں

ایہدے نور تھیں روشن کریئے آؤ چار پھیرا
ایہدے نور دے تائیں ڈھائیے جھوٹھ دیاں دیواراں

علم خزانے ایہدے اندر سوہنیاں صفتاں والے
اوہو پاندے جہڑے کردے اس تے سوچ وچاراں

توڑ قیامت ایہدے حکماں دنیا اندر چلنا
ایہدے اندر نور الہی حکمت بھریاں دھاراں

حکم ربانی سوہنا اُسوہ دوویں اس دے اندر
ایہ اک سوہنی نعمت بخشی پاک نبی سرکاراں

سوہنے رب نے گھلیا ایہ دستور حیاتی والا
عملاں تھیں پاکیزہ کردا رکھدا وچ حصاراں

آل نبی ، اصحاب نبی دی عزت آور دے
سوہنے پاک صحیفے رکھیاں ایہناں سر دستاراں

.....☆.....☆.....

آل پیاری پاک نبی دی

پاک نبی دی آل دے اُتوں اپنا تن من واراں
ایہناں اچیاں جاناں لئی میں مدحت ہار کھلاراں

پاک نبی دی آل نے سچ دی حرمت شان ودھائی
پاک نبی دی آل نے ڈھائیاں جھوٹھ دیاں دیواراں

پاک نبی دی آل پیاری اُچیاں شاناں والی
پاک نبی دی آل دا ناواں اچا وچ درباراں

جاناں وار کے آل نبی نے دین دی راہی کیتی
ایہناں اُچیاں جاناں لئی نہیں سھے باغ بہاراں

صدقے ایہناں اچیاں توں میں واری واری جاواں
جہاں اپنی ہک تے ڈکیاں جھوٹھ دیاں یلغاراں

پنجتن پاک دی مدحت کر کے پندیاں دل وچ ٹھنڈاں
پنجتن پاک دی مدحت کر کے اپنا سینہ ٹھاراں

ایہناں دا ای نور اے سارا رکھدے شان مثالی
ایہ جنت دے وارث سارے ایہناں سر دستاراں

خشبوواں دے ہلے آؤن ناں سوہنے جد چپے
ایہناں سوہنے ناواں نال ای مہکیاں سبھ گلزاراں

آل نبی دی مدحت کریے آقا وی بخش ہوندے
بخشش وٹدے کملی کالی نالے نور انواراں

ذکر صحابہ پاک دا کریے لذت ملے نرالی
ایہناں سوہنیاں ہستیاں وٹدیاں سبھ پاسے مہکاراں

.....☆.....☆.....

اصحاب رسولؐ

صدیقؓ، عمرؓ، عثمانؓ، علیؓ جے سوہن سنکھڑے یاراں
سوہنے دین بغچے اندر کیتیاں خوب بہاراں

چارے یار نبیؐ دے پیارے، چارے نور منارے
چارے مہر وفا دے سورج رکھدے اُج دستاراں

پاک ملائک ایہناں دے لئی نت دعاواں کردے
پیار سلاماں پیش چہ کیتیاں سوہنے نور اسواراں

ایہناں دے ای نور تھیں ہويا روشن آل دوالا
سبھ تھیں لطف عطاواں ونڈیاں سوہنے نقش نگاراں

چاروں اُچے رتبے والے ، چاروں نور دے چشمے
چاروں پاک نبیؐ دے عاشق رہندے وچ گلزاراں

باقی وی اصحابؓ نبیؐ دے روشن روشن تارے
جہاں دے ایمان تھیں ہوئیاں روشن سمجھے باراں

وچ غلامی ایہناں دی بس جیون اسیں بتائیے
ایہناں نال محبت کریے چمکن دل دیاں تاراں

ایہناں پاک نفوساں توں اے رب وی راضی ہویا
ایہناں وچ ای ونڈیاں سوہنے سوہنیاں سمجھ دستاراں

پاک اصحابؓ دی خدمت دے وچ لکھاں ہار سلناں
جہاں دیاں فکراں تائیں کھڑیاں ایہ گلزاراں

ایہناں سوہنیاں تکیا آپ نوں آپ دے نیڑے بہہ کے
ایہناں دے نین دل چمکائے پاک نبی سرکاراں

ایہ نین پاک پوتر سارے پاک نبی دے ساتھی
ایہناں اُتے نور نبی نے پائیاں نین چمکاراں

چاہت والے جام چہ پی کے مہکاں ونڈوے پئے نین
آقا ایہناں تائیں رکھیا اپنے وچ دلداراں

ایہ نین جھہاں واریا سبھ کجھ اپنا پاک نبی توں
پاک نبی دی ڈھال بنے جو جھہاں کھادیاں ماراں

سارے سوہنیاں شانناں والے، سارے افضل اعلیٰ
سارے خوب مثالی رکھدے اپنیاں طور اطواراں

ایہناں وچ کجھ خاص الخاص نہیں رتے ناتے ولوں
 کیتا دین اسلام نوں اُچا ایہناں ای جی داراں

ایہو عاشق صادق لوک نہیں روشن چن تے تارے
 ونڈی لاٹ محبت والی ایہناں نور میناراں

ایہ سبھ آپ دی صحبت بیٹھے آپ نوں رج رج تکیا
 چمیا آپ دا جسم مبارک ، سنیاں نہیں گفتاراں

.....☆.....☆.....

آپ دیاں گفتاراں

موتیاں وانگوں چمکن آقا آپ دیاں گفتاراں
علم خزانے ونڈن آقا آپ دیاں گفتاراں

مہر محبت پیار اخلاق دے پھلاں نال ایہ سجیاں
خُشبوواں تھیں مہکن آقا آپ دیاں گفتاراں


جاناں دے لئی راحت نہیں تے ایماناں دا حاصل
شاد دلاں نوں رکھن آقا آپ دیاں گفتاراں

ایہ نہیں ہر اک روگ دا چارہ ساڈا نیت سہارا
تن من کردیاں روشن آقا آپ دیاں گفتاراں

ڈلھکاں مارن ایہناں دے وچ رنگ حیاتی والے
پیار دا کھڑیا گلشن آقا آپ دیاں گفتاراں

سچائی دیاں مہراں لائیاں آپ نے ایہناں اُتے
اس دنیا لئی چائن آقا آپ دیاں گفتاراں

ہر اک دور ایچ ایہ تے رہنیاں تازہ پھلاں وانگوں
نویاں ہر دم لگن آقا آپ دیاں گفتاراں



حدیث نبوی ﷺ

ترجمہ

سوہنی نیت عملوں تائیں دیوے نور بہاراں
نیت نیہ نوں پکیاں کر کے عمل دا محل اساراں

ڈھال بنے گا روزہ تیرے ہور گناہاں اگے
روکے شر شیطان دیاں ایہ ہوون جو یلغاراں

نہ اوہ تیرے مال نوں دیکھے نہ اوہ تکی صورت
جھاتی مارے عملوں وٹے دیکھے دل دیاں باراں

شکر گزار نہیں لوکاں دا جو کوچھا اے اوہ بندہ
رب دا کیویں شکر گزارے وٹے کنج انواراں

چاہوو جو کجھ اپنے لئی اوہ دوجیاں لئی وی چاہوو
پکا انج ایمان اے ہوندا کھڑدیاں نیں گلزاراں

نکیاں اُتے رحم نہ کردا وڈیاں دی نہ عزت
اوہ نہیں ساڈے وچوں آکھیا پاک نبی سرکاراں

ایماناں دا حصہ جے ایہ نور حیا دا سوہنا
جے کر ہووے ایہ اکھیاں وچ پھٹدیاں نور پھہاراں

بوہتا ہسنا قلب نوں مردہ کر دیندا اے تہ ای
سوہنے آقا آکھیا دل نوں رکھو وچ حصاراں

غصے اُتے قابو پائیے نور ایمانی ودھدا
غصہ جے کر نہ کریئے تے نعمتاں ملن ہزاراں

نور امانت، وڈی دولت دل نوں شاہی دیندی
 جہڑا اس دی راکھی کردا پاوے شان وقاراں

نفس تے قابو جنھے پایا اوہ ای طاقت والا
 دشمن کولوں چت نہ ہووے رکھدا ہتھ مہاراں

نرم سبھا جو رکھدا جہڑا کھلے متھے ملدا
 اوہو رب دا پیارا اوہدے سر پھبن دستاراں

نیکی والی راہے پانا نیک عمل اے سوہنا
 رب توں منگاں توفیقاں میں اپنی ذات نکھاراں

بھیڑے کم نوں اسیں مٹائیے چنگے کم ول لگ کے
 چنگی صحبت رکھیے کریے چنگیاں سوچ وچاراں

تکے کتے برائی اوہنوں طاقت نال چہ ڈکے
انج نہ ہووے بھینڑا کہہ کے کریئے استغفاراں

جہڑا دوجے لوکاں دا اے اتھے عیب لکاندا
سوہنا رب وی بخشے اوہنوں دیوے پیار اتباراں

جہاں دا اخلاق اے چنگا اوہ ای لوک نیں چنگے
عزت، عظمت اوہ ای پاندے ہوندے وچ اُچیاراں

دین مکمل، اللہ اک تے، پاک رسول نوں متاں
صوم و صلاتاں سدھیاں رکھاں حج زکوٰۃ گزاراں

مال اسباب نہیں رکھدا بھاویں نور غنا جو رکھدا
اوہ اے اصل تو نگر رکھو اوہدے سر دستاراں

قرضہ لینا وڈی لعنت عیب اے دنیا داری
دیندا اے رسوائیاں نالے رکھدا وچ بیماراں

رشوت لینا ، رشوت دینا دوویں ناری کم نیں
لعنت والا کم اے لیہنوں پھڑیا اے بدکاراں

اک دو جے تھیں تحفے دیئے پیار محبت ودھدی
کینے دور نیں ہوندے اس تھیں نکھرن فکر افکاراں

خدمت جہڑا قوم دی کردا اوہ سردار اے اصلوں
پیار محبت سو بھا پائی قوم دے خدمت گاراں

سائل تائیں نیکی کرنا صدقہ ای اکھوائے
مندا کدی نہ بولو اُس تھیں نرم کرو گفتاراں

افضل اوہ انساناں وچوں جو قرآن دا طالب
 سینے لائے نالے ونڈے اس دیاں نور افکاراں

جیویں کھاندى اگ لکڑی نوں انج حسد اے کھاندا
 نیکیاں تائیں ساڑ کے رکھیا ایہدے شر اثراراں

جہڑا اپنی ذات نوں ایتھے عجز مقام اے دیندا
 سوہنا رب ہمیشہ دیوے عزت دیاں دستاراں

رحم کرے نہ جو دوجے تے رحم کدے نہ پاوے
 اوہدے کہلوں دور ای رہندیاں رحمت والیاں دھاراں

پیار، محبت اتے عداوت رب دے لئی جو رکھدا
 اوہ اے اچے عملاں والا رہندا وچ مداراں

مومن دے لئی بندی خانہ کافر دے لئی جنت
ایہ دنیا تے ایہدیاں ظاہری سبھے باغ بہاراں

موت نصیحت کافی اے بس عبرت دے لئی اتھے
موت نوں جہڑا یاد اے رکھدا رہندا وچ بیداراں

پیار سلام نوں عام چہ کرنا سوہنی پیاری عادت
امن امان اچ رکھے سبھ نوں ونڈے پھل مہکاراں

تد ہوندا ایمان مکمل جے کر آپ جو چاہو
اوہو ونڈو ونڈن لکیاں اندر غیراں یاراں

اپنے کول قناعت والی دولت رکھدا جہڑا
اوہدا مال کدے نہیں مکدا وانگوں دنیا داراں

سچ نیکی دے پھل کھڑاندا جنت ول لے جاندا
 سچ اے سوہنا سوہن سنکھڑا رکھدا نور انواراں

اوہ نہیں ساڈے وچوں جہڑا دھوکھا دیون والا
 آکھیا اپنی اُمت تائیں پاک نبی سرکاراں

حرص امیداں ودھدیاں جاون بندہ بڈھا ہووے
 اوہ دھوکھا نہیں کھاندا جہڑا کردا استغفاراں

شرک نہ کرنا بھاویں تہاڈا جسم جلایا جاوے
 بوٹیاں نوچن بھاویں کافر دیون دکھ ہزاراں

جس دے ہتھوں اتے زباناں رہن سلامت مسلم
 اوہو ای نہیں مسلم جہڑے ونڈن چین قراراں

اک سوراخوں دو واری تے مومن ڈنگ نہیں کھاندا
 اوہدے کول اے علم تے حکمت اوہ نہیں وچ گنواراں

ماواں دے قدماں دے تھلے رب نے جنت رکھی
 سوہنا تاج سعادت پایا ماں دے خدمت گاراں

زہر اچ بجھے تیر شیطان نے رکھے کول نہیں جہڑے
 بد نظری دیاں اوہناں وچ ای ہندیاں ہین شماراں

بخل تے بداخلاقی کٹھیاں مومن وچ نہیں ہندیاں
 مومن دی نہیں شان کہ اُس تے چلن ایہ پُرکاراں

آپ دیاں سوہنیاں گلاں والے علم خزانے ونڈ کے
 آپ دے سوہنے ناں جپاں تے پاواں چین قراراں

.....☆.....☆.....

سوہنے نام نبی دے سارے

سوہنا نام محمد ﷺ پیارا جیہدیاں سبھ جھلکاراں
عرشاں فرشاں اندر ویکھیاں ایہدیاں نوری دھاراں

آپ دا ناں اے احمد پیارا سوہنیاں جہدیاں دکھاں
ایہنوں ساہویں رکھ کے سوہنی رب دی حمد چتاراں

آپ دا ناں اے حامد سوہنا اُچ تعریفاں والا
سوہن سنکھنے میں اس ناں تھیں اپنی ذات نکھاراں

آپ دا ناں محمود اے اُچا اُچیاں شاناں والا
اُچے سچے میں اس ناں تھیں اپنے بخت سنواراں

آپ دا ناں اے قاسم پیارا نعمتاں وٹن والا
دامن بھرلاں ایہدے صدقے پاواں نور پھہاراں

آپؑ دا ناں مختارؑ وی سوہنا جس دے ہتھ خزانے
جہڑا ونڈے سارے جگ تے پیار دیاں مہکاراں

آپؑ دا پیارا نام اے فاتحؑ جس دے نال نیں جتاں
جہڑا حق دا داعیؑ روکے کفر دیاں یلغاراں

آپؑ دا ناں اے شاہدؑ سوہنا نور گواہی ونڈدا
جس دی برکت رحمت نال نیں سجیاں پیار بہاراں

آپؑ دا پیارا نام اے حاشرؑ سوہنا نور منارا
جنہوں من کے احد احد آکھیا اوگن ہاراں

آپؑ دا ناں مشہودؑ اے اچّا جس دا ہر تھاں جلوہ
جہدیاں پاک ملائک صدیاں تکدے رہے انواراں

آپؐ دا نام رشیدؐ اے سوہنا جہڑا سبھ دا ہادی
نھیریاں وچوں کڈھ کے جنھے دیتیاں نور افکاراں

آپؐ دا نام بشیرؐ وی لکھیا دیندا جو خوش خبراں
جس تھیں کھلریاں نیں تنویراں کردا روشن باراں

آپؐ دا نام نذیرؐ ویؐ سوہنا باطل دی حد دتے
ذہناں نوں بیداری دیوے رکھے دور اشراراں

داعؐ بن کے دعوتِ دتیؐ آپؐ نے شام سویرے
داعی بن کے حق دے حق وچ کیتیاں نیں گفتاراں

شافؐ بن کے آپؐ نے ہر اک درد دا چارہ کیتا
روحاں دا درمان چہ کیتا ونڈیاں نوری دھاراں

ابطحیٰ اسم مبارک سوہنا بطحا شہر دی نسبت
جتنے سچ نون جتاں ملیاں جھوٹھ نون ملیاں ہاراں

ہادیٰ اسم مبارک آپ دا ونڈے نور ہدایت
جہل دے پنجرے توڑے جنھے دتیاں پیار پکاراں

مہدیٰ پیارا نام نبیٰ دا گمراہی نون کٹے
جیون پیار سوغاتاں ونڈے اپنے وچ دلداراں

مہدیٰ سوہنا نام آقا دا نہیرے مار مکاوے
ایہدے تائیں دل وچ اترن نور دیاں چپکاراں

ماحیٰ دیاں لاٹاں کردیاں باماں تائیں روشن
ایہناں روشن باماں تائیں اپنا دھن من واراں

منجِ آکھ کے پاک نبیؐ نوں سوہنا سرور متھیا
سوہنے سرور آقاؐ دتیاں سبھ نوں شان وقاراں

ناہِ سوہنا نام نبیؐ دا صدق صفا سرناواں
سبھناں دے دل دھوتے اس تھیں پاک نبیؐ سرکاراں

آپؐ رسولؐ خدا دے سوہنے خوبیاں نال بھرے نیں
ہستی آپؐ دی پھل پرچی اچی وچ گلزاراں

سوہنا پاک نبیؐ اے آپؐ دا سوہنا سوہنا ناواں
سبھناں تائیں خوب رجایا آپؐ دے نقش نگاراں

امیؐ آپؐ نوں رکھیا سارے دتے علم خزانے
آپؐ معلمؐ ، ہادیؐ ، رہبرؐ آپؐ دے ہتھ مہاراں

آپؐ تہامیؐ حسب نسب وچ آپؐ نہیں سبھ توں اعلیٰ
آپؐ نہیں شان تے شوکت والے آپؐ دے سردستاراں

ہاشمیؐ آپؐ دا لقب اے پیارا دوئیں جہانیں اچّا
نقش مبارک آپؐ دے سوہنے چٹے نور اسواراں

آپؐ عزیزؐ نہیں سبھناں دے لئی شان بزرگی والے
امت دے رکھوالے آپؐ نہیں سبھ دیاں لیندے ساراں

طہؐ سوہنا نام اے پیارا ونڈ دا نور نظارے
پاک مبارک ناں ایہ جپاں اپنا سینہ ٹھاراں

آپؐ رؤفؐ رحیمؐ نہیں آقاؐ رحمت بن کے آئے
آپؐ دی رحمت رافت رکھے سانوں وچ حصاراں

آپُ حریصُ نہیں اُمت دے لئی منگدے بخشش رحمت
ایسے پیار دے چشمے کول میں اپنی عمر گزاراں

آپُ دا پیارا ناں فتاحُ اے جو دروازے کھولے
پیار دی مشعل بالے جہڑا ونڈے سوچ وچاراں

آپُ نے مصباحُ بن کے جگ وچ جگمگ جگمگ کیتا
اوہو روشن ہويا جنھوں ملیاں نور انواراں

آپُ حجازیُ سوہنی نسبت سانوں لگے پیاری
آپُ دی حکمت، آپُ دی چاہت ونڈے پیار اتباراں

آپُ امرُ نہیں سوہنے رب دے آپُ نقیبُ وی سوہنے
بنے خطیبُ تے خوب ہلایاں ستیاں دل دیاں تاراں

آپؐ نہیں عجمیؐ آپؐ نہیں عربیؐ آپؐ نہیں مکیؐ مدنیؐ
مائلؐ کیتا خوب دلاں نوں آپؐ دے ذکر اذکاراں

ناطقؐ بن کے سبھناں تھیں قرآن دی دولت وٹدی
نال خوشی دے جھولی پائے ایہ پھل نیکو کاراں

حافظؐ آپؐ دا ناں اے کردا سبھناں دی نگرانی
لطف حیاتی والا وٹدا اپنے وچ پیاراں

عالمؐ پیارا نام آقاؐ دا دے بھید حیاتی
پاندا سوہنا دل دل جھاتی وٹدا سخن ہزاراں

واعظؐ بن کے آپؐ نے آقاؐ نور افشانی کیتی
سوہنا نور پچھاتیا ناہیں ازلاں دے گنواراں

آپؐ دا پیارا نام فصیحؐ اے خوب فصاحت بھریا
آپؐ دیاں پاک اداواں اُتے اپنی جان نثاراں

آپؐ نیں اولیؐ ، اعلیٰؐ ایسے مثل مثال نہ جس دی
نور اچ ڈھلی ذات مبارک سبھ دیاں لیندی ساراں

آپؐ ترازیؐ ، آپؐ قریشیؐ ، آپؐ حجازیؐ ، آقاؐ
آپؐ دا نام ای دنیا اندر اچا وچ درباراں

آپؐ مبلغؐ ، مومن کاملؐ ، واعظؐ ، صادقؐ ، سید علیؑ
آپؐ مکرمؐ ، آپؐ مبشرؐ ، صاحبؐ وچ سرداراں

آپؐ منیبؐ نیں آپؐ حبیبؐ نیں آپؐ نیں ناطق عالمؐ
خیرانام اے آپؐ دی ذات ای ونڈے جو دستاراں

آپؐ دا سوہنا نام شفیعؑ اے نور شفاعت و نڈا
بخشش دا سر چشمہ آپؐ نین خوشیاں دین ہزاراں

سوہنے نوں منصورؑ بنا کے شانناں رب ودھائیاں
رفعت، عظمت آپؐ نے و نڈ کے پائیاں ٹھنڈاں ٹھاراں

ناصرؑ بن کے آپؐ آئے تے ٹٹے دل سبھ جوڑے
ظلمت دے وچ گھریاں پائیاں نور دیاں جھلکاراں

سوہنے نے متصدقؑ بن کے باطل آن مٹایا
پیار صفائیاں آکروائیاں شرک دیاں بیماریاں

آپؐ مصدقؑ بن کے آئے سچ نوں عام چہ کیتا
ڈکیا بھاویں آپؐ نوں تھیں تھیں جھوٹھ دے ٹرل مناراں

ختم الرسلؐ ، مولائے کلؐ ، آپؐ دی ذات گرامی
خیر بشرؐ تے خیرؐ ورأتے اپنا تن من واراں

آپؐ حبیبؐ لیبؐ خدا دے ڈیرہ پاک مدینے
ونڈدے پئے نیں نور خزینے جس دیاں نہیں مقداراں

آپؐ صفیؐ نیں نور صفہ دے چشمے اُتے بیٹھے
رج رج پیندے جہڑے جاندے روشن پاک دیاراں

آپؐ ولیؐ نیں ایسے جہڑے سبھ دی راکھی کردے
اپنے اک اک اُمتی تائیں رکھدے وچ شماراں

سوہنا نام حبیبؐ اے آقاؐ آپؐ دا پیارا پیارا
جہدیاں لپکاں جھولی پائیاں آپؐ دے خدمت گاراں

نام شکور اے آپ دا سوہنا سیرت دا لشکارا
جنھوں سامنے رکھ کے کردی دنیا ہار شنگھاراں

خاتم بن کے آپ آئے تے ونڈے حرف ہدایت
نور خدا جس جھولی پایا ہويا وچ اچیاراں

ذات قوی بس پاک نبی دی قول عمل وچ دیکھی
ہر اوکڑ ہر مشکل دے وچ پڑھیاں استغفاراں

سوہنا نام ہی آقا دا کرے حفاظت سوتنی
اپنی وچ حفاظت رکھے دور کرے خرکاراں

سوہنے آقا آپ غنی نہیں سبھ دے دامن بھر دے
آپ دے درتوں دولت پائی دنیا دے زرداراں

سوہنا نام مبین آقا دا نقش یقین اگیڑے
آکھے ڈور نفس دی کھچو اڈو بن بن ڈاراں

آپ مبلغ بن کے آئے ونڈیاں پیار بہاراں
آپ نے خوب پلائیاں آکھے نوری ددھ دیاں دھاراں

حق لئی حجت بن کے آئے آقا دنیا اندر
ٹھلہا بیڑا توحیدی لے نور دیاں پتواراں

آپ دا نان برهان اے سوہنا سچ نتارے جہڑا
نال دلیلاں نقش جمائے جنھے وچ مداراں

مومن آپ دا نام اے پیارا مثل مثال بنایا
جہدیاں سارے جگ تے ونڈیاں سوہنے رب مہکاراں

رب نے پیار دے ناں نال سدیا آپؐ نوں مدنی ماہیؐ
 آپؐ دی سوئی ذات اے اچی اوہدے وچ شہکاراں

آپؐ منیبؐ نہیں سوہنے آقاؐ خوب دلاں نوں دھوندے
 میں وی پیار پیری بوواں غفلت خول اتاراں

کاملؐ سوہنا ناں آقاؐ دا حسن صفاتاں ونڈے
 روشن چن چراغؐ چہ کیتے آپؐ نے لکھ ہزاراں

آپؐ نہیں آخرؐ آپؐ نہیں اولؐ آپؐ نہیں رہبرؐ ہادیؐ
 چلی انج منادی آپؐ دی جیوں چلن پرکاراں

آپؐ امینؐ امانت والے اُچ معیار نہیں رکھدے
 حسن امانت آپؐ توں سکھیا دنیا دے سچاراں

ناں عبداللہؑ آپؑ دا سوہنا جگمگ جگمگ کردا
ایسے ناں تھیں روشن ہوئیاں جگ دیاں سمھے باراں

آپؑ کلیمؑ نیں ایسے جا کے عرش تے گلاں کردے
آپؑ بشر دے جاے اندر، اودھر نور انواراں

سوہنا نام مطیعؑ اے آپؑ دا رب دی شان دا مظہر
جنھے پاک حبیبؑ دے تائیں دتیاں نیں دیداراں

ظاہرؑ سوہنا نام وی پیارا شان وقار ودھاندا
دھرتی اے یا عرش بلندی ایہدیاں ای چکاراں

باطنؑ ایسا نام اے پیارا ہر تفسیروں اچا
ایہدا ذکر مبارک کریئے ملدیاں باغ بہاراں

آخرُ پیارا نام نبیٰ دا اچیاں شانناں والا
محشر دے وچ ایسے ناں دے ہونیاں ہتھ مہاراں

اولُ سوہنا نام نبیٰ دا بعد خدا دے آؤندا
دنیا اُتے حشراں توڑی ایہدیاں ای مہکاراں

آپُ یتیم اکھوائے نیں پر سبھناں اُتے سایا
ویکھیا ساری دنیا نے تے نالے لیل نہاراں

نام حکیم نبیٰ دا بھارا حکمت جہڑا ونڈے
کر نہیں سکدیاں کدے احاطہ ایہدا ایہ البصاراں

آپُ کریم ، عظیم ، نبیٰ نین کرم کماون والے
آپُ دی مہر محبت نال ای وسن دل دیاں باراں

آپُ سرانجُ منور بن کے اس دنیا تے آئے
آپُ دے نور توں رشناں لئیاں سبھناں لالہ زاراں

ذات اے محرمُ آپُ دی سوہنی دور کرے گمراہیاں
آپُ توں بھکھیا عشق دی لئی اے عشق دیاں سالاراں

آپُ محللُ راحت و نڈنُ فیض اے آپُ دا جاری
آپُ دے لطف دا صدقہ رہندی دنیا وچ خماراں

آپُ مبشرُ بن کے آئے و نڈیاں عشق سچائیاں
آپُ دی مہر محبت پائی پھلاں ، کلیاں ، خاراں

آپُ مذکرُ ، ناصحُ ، مشفقُ سوہنی گل سجھاوَن
وجداناں تھیں بخشیاں آپُ نے فکراں تے افکاراں

سوہنا نام خلیلؑ نبیؑ دا پاک خلیل دی نسلوں
وصل ربانی پایا آپؑ دے سوہنے رشتہ داراں

نام جوادؑ اے آپؑ دا سوہنا جو د سخا دا چشمہ
نور سبحانی ونڈے سبھ وچ اپنے نال معیاراں

عادؑ آپؑ دی ذات اے پیاری عدل کماون والی
لطف دے پھل ورتاوے سبھ وچ بخشے چین قراراں

پاک رسولؑ ملاحمؑ کردے نرم مزاجاں تائیں
جہڑے آپؑ دی صحبت بیٹھے بھل گئے سبھ تکراراں

آپؑ نیں آقاؑ سیدؑ صاحبؑ سارے وچ جہاناں
دل شیشے چکائے آپؑ نے بہہ کے نور دیاراں

رحمتِ عالم اُتے توں ورسائیں پھل ایہ سوہنے
صل اللہ میں آکھاں مولا لکھ کروڑاں داراں

آپ دا ناں اے عاقب اُچا آخرتے جو آیا
اکمل دین دی نعمت کیتی واسطے دنیا داراں

آپ مبلغ بن کے آئے ونڈیاں آن بہاراں
آپ نے خوب پلائیاں اتھے نوری دُده دیاں دھاراں

آپ دا ناں یسین مبارک شان نرالی رکھدا
ایہ وے سایا پاک نبی دا اُتے دنیا داراں

آپ منزل آپ مدثر صدق امام نیں آقا
آپ دا تقویٰ زہد عبادت رنگ بہار نگاراں

آپؑ دا پیارا نام اے طاہرؑ سوہنا تے پاکیزہ
راحت کیف دوامی دیوے بن کے چھاں چھتئاراں

آپؑ دا سوہنا نام اے طیبؑ پاک پوتر کردا
منظر اجلے اجلے کردا رکھدا وچ بیداراں

آپؑ دا سوہنا نام مدثرؑ کملی والے آقاؑ
آپؑ دی اُمیؑ شان دیاں نیں ایہدے وچ اظہاراں

آپؑ دا نام متینؑ اے آقاؑ مے توحیدی ونڈے
نھیریاں اندر چائن ونڈے وانگ مشعل برداراں

مصباحؑ آپؑ دا نام ہے پیارا جس تھیں دنیا روشن
دل شیشے اس صاف چہ کیتے لاہیاں دھوڑ غباراں

آپؐ دی سوہنی ذات اے حجۃؐ، سبھناں دے لئی آقاؐ
غفلت تائیں دور نساوے رکھے وچ ہشیاراں

ساڈے لئی انعام نیں آقاؐ آپؐ دے ناں ایہ سوہنے
ایہناں تائیں عشق جے کریئے کھڑدیاں فر گلزاراں

آپؐ دے سارے ناں میں آقاؐ سوہنے نور وظیفے
آپؐ دے بارے جہڑا سوچے ہووے گم اسراراں

آپؐ دے ہتھ تے ہتھ اوہ رکھ کے آکھے ہتھ ایہ میرا
اپنے کول بلاوے آپؐ نوں بھیجے برق اسواراں

آپؐ اعجاز سراپا آقاؐ آپؐ دے وانگوں کہڑا
آپؐ نوں مولا آپؐ کھلاوے، رکھے وچ حصاراں

ﷺ

.....☆.....☆.....

معجزات

آپؐ آئے تے چارے پاسے کھڑ پیاں گلزاراں
آپؐ دی رحمت برکت دے نال ہویاں نور انواراں

آپؐ دی نظر سولی پاروں دور ہوئے غم سبھ دے
آپؐ دے آیاں میرے آقا روشن ہویاں باراں

ورق ورق قرآن دا آقا آپؐ دی عظمت دے
آپؐ دیاں تعریفاں کیتیاں دشمن وی سرکاراں

چشمے اُبلے ، پتھر بولے ، چن ہويا دو ٹوٹے
آپؐ دے آیاں رُک گیاں سبھ کفر دیاں یلغاراں

آپؐ نے ہتھ ہلایا تے فر سورج پرت چہ آیا
رب نے دتیاں ویلے دیاں آپؐ دے ہتھ مہاراں

وچ پنگھوڑے چن کھڈونا کھیڈن دے لئی ملیا
دیکھ کے اوہ وی بخش ہوندا سی آپؐ دیاں جھلکاراں

کفر دی اگ وچ سڑھے جتے اپنے پیار تھیں ٹھارے
لطف دا مینہ ورسایا سبھ تے آپؐ دے نور افکاراں

اس دنیا نوں ہر اک نعمت آپؐ دے صدقے لبھی
سوہنے نور نے جھاتی پائی وسیاں نور پھہاراں

آپؐ دا حکم صحابی نے جد رکھ نوں جا کے دتا
آپؐ دی خدمت دے وچ آیا وانگوں خدمت گاراں

بند مٹھی وچ کنکر لے کے کافر سی جد آیا
کلمہ پڑھ کے کنکراں دسیاں آپ دیاں شان وقاراں

ہجر نبی دے اندر رویا سکا رُکھ حنانہ
دور ہوئیاں جد اوہدے کولوں نوری ٹھنڈاں ٹھاراں

سوہنے نوں معراج کرایا رب نے کول بلا کے
سیر کرائی عرشاں دی تے بخشیاں نور انواراں

کیہ کیہ گلاں کیتیاں ہونیاں رب نے کول بلا کے
ایہ پردہ اے اس پردے چوں جھاتی پان بہاراں

معجزیاں تھیں بھریا سارا آپ دا حسن سراپا
رب نہیں جہدیاں کھا کھا قسماں کیتیاں نہیں گفتاراں

.....☆.....☆.....

سراپا مبارک

جان توں پیارا ، نور دا پیکر ، ونڈدا نور انواراں
ساڈے سبھ دے دل دا محور لیندا ساڈیاں ساراں

جس دی دیدنوں پل پل تڑسے آپ دا ہر اک بردہ
سوہنا مکھڑا ، پاک معطر ، دیوے نت بہاراں

ستے بھاگ جگاون والا ، اس اُمت دا والی
پیار دا مظہر ، نور مبشر ، سوہنا وچ گلزاراں

پھل رحمت دے ونڈدا جہڑا ، سبھ نوں راحت دیندا
مُشفق ، داعی ، شافع محشر رکھدا وچ حصاراں

چین دلاں دا بن کے آیا ساڈا طجا ماوی
 محسن ، ہادی ، مہر منور ، دیندا شان وقاراں

خلق دی خشبو ، نال معطر جس دنیا نوں کیتا
 شان منزل ، شان مدثر ، جس دے ہتھ مہاراں

ساڈا سبھ دا سچا ہادی ، مکی ، مدنی ، ماہی
 خاتم بعثت ، اکمل رہبر ، اچا وچ سرداراں

جس دے ہتھ اے سبھ مختاری ، جس دی صورت پیاری
 روشن مکھڑا ، برتر بہتر ، بخشے ہن دیداراں

حسن سراپا جس دا اعلیٰ ، سوہنا اچیاں شاناناں والا
 نبیاں دا سرتاج مبشر ، ونڈدا جو دستاراں

حسن سراپا آپؐ دا سوہنا ونڈدا نور پھہاراں
 حسن سراپا آپؐ دا سوہنا دیندا چین قراراں

حسن سراپا آپؐ دا لکھے کس دی ایسی طاقت
 حسن سراپا جھاں تکیا پے گئے سوچ وچاراں

دیکھن والیاں ویکھ کے آپؐ نوں کجھ گوڑ نیں لائے
 کجھ اٹھائے نقش نگینے ونڈیاں کجھ مہکاراں

اوہناں دے ای کہن مطابق میں کجھ موتی چک کے
 حسن سراپا آپؐ دا لکھ کے پاواں شان وقاراں

سوہنے رب نے وچ صحائف نقشے لیکے نوری
 وچ صحائف نوری لیاں نبیاں تھیں اقراراں

آپُ دی ذات صفات دے سورج رب نے روشن کیتے
 آپُ دے آن توں پہلاں جگ وچ پیاں پیار پکاراں

پاک محبوبُ دی شان دے ڈنکے رب نے خوب وجائے
 سبھ پاسے اعلان چہ ہويا آؤنا چن سرکاراں

سوہنا اوہ محبوبُ اے پیارا جس دا کوئی نہ ثانی
 رب نے رحمت آکھ کے دتیاں اوہدے ہتھ مہاراں

ازلی نور تے بشری جامہ آپُ دی پک نشانی
 جس دا سوہنا نام جے چپے خوشیاں ملن ہزاراں

آپُ دے نور دی گل نہیں چھوئی اوہدیاں وکھریاں شاناناں
 بشری جامے دی گل کر کے اپنے بخت سنواراں

رنگ سفید سی سرخی مائل صاف تے روشن سوہنا
قد میانہ قامت کھڑدی رکھدی شان وقاراں

نوری مکھڑا پیارا پیارا دل وچ کھبن والا
جے کر اوہنوں دیکھ لواں تے اپنی جان میں ہاراں

چن سورج دے کولوں آقا آپ دا روپ سوایا
اس دھرتی توں عرشاں توڑی آپ دیاں جھلکاراں

گنڈلاں وانلے نہ انی سدھے گیسو پیارے پیارے
رب جہاں دیاں قسماں کھاوے جہاں نال بہاراں

سر سرداراں ورگا وڈا خوب سی سبھ نوں بھاندا
پاک عمامہ رکھیاں جس تے دیندا سی چمکاراں

شانیاں دے وچکار سی آپ دے مہر نبوت والی
جنہوں ودھ ودھ چمیا آپ دے سبھناں ای دلداراں

متھا آپ دا روشن روشن لاٹاں دیون والا
جیہدے نور دے نال ای ہویاں ہر پاسے انواراں

بھنواں دراز باریک سی دوویں آپس دے وچ ملیاں
اکھیاں لئی ایہ تاج نورانی کردا ہار شنگھاراں

صدقے سوہنیاں اکھیاں اتوں واری دنیا ساری
نور حقیقی جہاں اکھیاں تکیا وانگ بیداراں

دند مبارک آپ دے سوہنے سچے موتیاں ورگے
جہاں دیاں سن جگمگ کردیاں ہر پاسے چمکاراں

کلیاں وانگوں کھڑیا ہاسہ خوب متانت بھریا
جس دی بھکھیا منگن ٹریاں سبھے باغ بہاراں

پاک زبانوں نکلیاں گلاں آئیاں وچ تحریراں
اوہ نیں وحی الہی یا فر نور و نور افکاراں

پاک لعاب دہن سی آپ دا دکھ دا دارو کردا
کھارے کھوہ جس مٹھے کیتے کٹے روگ بیماراں

آپ نوں بخشی پاک سماعت اچیاں شانناں والی
دھرتی تے اسمان سی سبھے آپ دے وچ حصاراں

ہتھ محبت وڈن والے دل وچ ٹھنڈاں پاندے
جتھے جتھے وی مس ہوئے کھڑیاں نیں گلزاراں


سوہنیاں سوہنیاں اُنگلاں وچوں نہراں آپ چلائیاں
ایہناں وچوں نکلیاں پل پل رحمت والیاں دھاراں

آپ دے وضو مبارک توں وی جہڑا پانی لتھیا
اوہنوں اپنے جسم تے ملیا آپ دے جان نثاراں

سوہنی ٹور مبارک آپ دی اُچیاں شانناں والی
عرش مکانے حد اے جس دی ہوئیاں دور مداراں

آپ دا روپ سراپا سارا معجزیاں تھیں بھریا
جس دے تائیں جھاتی ماریے چمکن دل دیاں تاراں

آپ دا روپ جمال الیک کے رب نے قلم چہ دھریا
کن کہہ کے جد فارغ ہوا رُجھ گیا وچ دیداراں



دیدوی تانگھ

اسیں آں آپ دی دید دے بھکھے منگیے نت دیداراں
آقا ساڈا لکھ لٹو ناواں اپنے وچ دلداراں

دل دی آس ایہ پوری ہووے آقا کرم کماؤ
نوری جلوہ نظر بے آوے اپنا سینہ ٹھاراں

میں اوہ پیارے لمحے اج وی دل وچ سانہ کے بیٹھا
جد اوہ سوہنیاں مکی مدنی ملیاں سی انواراں

بھاگ مرے جے چمکن تے فر نوری شہر اوہ تکاں
جتھے آقا پاک دی خشبو رچی وچ گلزاراں

مکہ پاک دے پاک نظارے کسراں میں بھل سکدا
جتھے آقا سوہنے دیاں تھان تھان نہیں مہکاراں

.....☆.....☆.....

مکہ پاک

مکہ پاک اے شہر اوہ سوہنا جتھے پیار بہاراں
جتھوں دا اے ذرہ ذرہ گھنیا وچ انواراں

ابراہیم خلیل اللہ دا خاص مقام اے ایتھے
نار اچ سٹیا جھاں تائیں کھڑ پیاں گلزاراں

اسمعیل ذبیح اللہ دا چلدا نام اے ایتھے
جھاں خوب چلائیاں اپنے عشق دیاں پرکاراں

”زم زم“ والا اس دھرتی تے ملدا زندہ پانی
جہڑا نت شفاواں ونڈے رکھے وچ حصاراں

”صفا تے مروہ“ مولا پاک دی ایتھے خاص نشانی
بی بی پاک دے نقش نہیں سوہنے جتھے نور پھہاراں

اتھے سوہنا ” کعبۃ اللہ “ ” حجرِ اسود “ اتھے
جہاں تائیں ویکھ کے چمکن ساڈے دل دیاں تاراں

مولد پاک نبیٰ دا اتھے اُچیاں شانناں والا
وج قرآن دے جس دے بارے کیتیاں رب گفتاراں

پاک حرم دا اک اک ذرہ پاک پوتر سوہنا
”غار حرا“ تے ”غارِ ثور“ نیں پاک مقدس غاراں

”جبلِ نور“ اوہ پہاڑ وی اتھے جتھے نور سی کھنڈیا
وحی الہی اتری جتھے ہویاں نور انواراں

پاک نبیٰ دا خاص اے حجرہ غار حرا وی اتھے
جتھے بہت قیام سی کردے پاک نبیٰ سرکاراں

پاک حرم دی شام وی سوہنی صبح سویر وی سندر
پاک حرم نوں رج رج تکاں دل دیاں اکھیاں ٹھاراں

پاک حرم دیاں سوہنیاں شانناں آقا پاک دے صدقے
پاک حرم وچ حاضر ہوواں سجدے خوب گزاراں

کفر شرک نوں ایس جگہ توں انج نابود اے کیتا
ایس جگہ تے ہو نہیں سکدیاں کفر دیاں یلغاراں

اٹھے پہر ای جتھے نجمی جنتی واواں چلن
سوہنے پاک دوارے جا کے مہکن دل دیاں باراں

مکے پاک دا خاص مقام اے اللہ دا گھر اتھے
ایپر پاک مدینے دی کھچ لیندی وچ حصاراں

.....☆.....☆.....

مدینہ پاک

اوتھے قسمت بن بن جاندی اوتھے پیار بہاراں
اوتھے رحمت مینہ ورساندی کھڑدیاں نیں گلزاراں

اوتھے نور زمین زمان دا اوتھے نور انواراں
اوتھے سارا حسن جہان دا سوہنیاں سبزہ زاراں

اوتھے عرشوں نوری آندے فرشی تانگھاں رکھدے
اوتھوں ملدا آب حیاتی وسدیاں دل دیاں باراں

اوتھے سبھ دا محرم جانی ، ملدا وصل ربانی
اوتھے پیندی دل تے جھاتی اوتھے نور پھہاراں

اوتھے نور دے ہڑ پئے وگدے لٹ لٹ دیوے جگدے
اُس دھرتی نوں رج رج تکاں دل دیاں اکھیاں ٹھاراں

اوتھے سبھناں دے رج ہوندے حاجیاں دے حج ہوندے
اوتھوں ملدی پیار دی دولت چمکن دل دیاں تاراں

اوتھے اکھیاں فرش وچھاون نوری بوسے چاوان
اوتھے جہڑا جاوے اُس دیاں ودھدیاں شان وقاراں

اوتھے رحمت لاندی جھڑیاں روح دیاں چڑیاں تڑیاں
اوتھے دل دے سجدے ہوندے نٹھیاں ملن ہزاراں

دل وچ تانگھ اے ویکھاں جا کے اوہ اچیاں درباراں
منگدیاں جتھوں روپ بہاراں سبھ کھڑیاں گلزاراں

جھولیاں بھر بھر دیون سبھ نوں خالی کدے نہ موڑن
میں وی ستے بھاگ جگاواں میں وی سینہ ٹھاراں

سوہنے ذکر دے چانن اندر میرا دم دم گزرے
ذکر محبت آپؐ دا کریئے کھنڈ جاون مہکاراں

آپؐ جہیا نہ کوئی وی جگ وچ دردی ساڈا آقاؐ
انج تے سار لئی اے ساڈی کنیاں ای غم خواراں

میں تہاڈی تو صیف کیہ لکھاں میں عاجز میں قاصر
تہاڈا شان جہاناں کولوں اچا اے سرکاراں

نال صحابہؓ کیتیاں آپؐ نے جہڑیاں گلاں باتاں
ساڈے لئی نہیں نور ہدایت تہاڈیاں سبھ گفتاراں

جتھے جتھے سوہنے آقا قدم مبارک رکھے
اوتھے اوتھے ونڈیاں جاوَن اَج وی موہ مہکاراں

اپنی جان دے دشمن نوں پئے آپ دعاواں دیندے
ایہو جیہاں سوچاں لبھن اُچیاں وچ درباراں

جتھے نور سویرا ہوندا نخبوواں دا گھیرا
اوسے شہر مدینے اندر جا کے قلب نکھاراں

جتھے رحمت دے ہڑوگدے ہر رنگ دے پھل کھڑدے
آپ دے روضہ پاک تے اپڑاں اپنی عرض گزاراں

طیبہ ، طابہ ، پاک مدینہ مٹھاتے من موہنا
سوہنے شہر مبارک جاواں بیٹری پار اتاراں

شہر نبیؐ دیاں ریاں دسو کون بھلا کر سکدا
شہر نبیؐ سبھ اوگن دھوندا رکھدا وچ حصاراں

روح نوں ٹبے ، اکھیاں ٹھارے ، روضہ پاک اُچیارا
جنتی باغ بگیچے ونڈے نخبوواں مہکاراں

گنبد خضرا بھاگ جگامے عشق خزانے ونڈے
دیوے پیار شفاعت سبھ نوں رکھے سر دستاراں

پاک مواجہ سوہنا موہنا شان نرالی رکھدا
روضہ جنت ٹھنڈا اکھیاں دی ونڈے پیار بہاراں

عرش توں اُچی تھاں اے سوہنی آپ دے روضے والی
نور نرالا سبھ توں بالا کردا پُر انواراں

شہر نبیٰ وچ اٹھدے رہندے رحمت والے ہلے
شہر نبیٰ اے شانناں والا اچا وچ دیاراں

شہر نبیٰ دا جہے اپنے دل وچ عشق رچایا
اوپدے اُتے رحمت والیاں وسدیاں رہن پھہاراں

اُٹھے پر بہاراں اوتھے رنگ خشبوواں وٹن
روح نوں ملدی لذت سوہنی دل نوں چین قراراں

اوتھے گزرے گھڑیاں تے پل دل دے چین سہارے
اوتھے کرن سلاماں آؤن شکر لکھ ہزاراں

جے کر آقا کرم کماون سدن برودے تائیں
وچ مدینے جا بیٹھاں میں پیار نماز گزاراں

.....☆.....☆.....

روضہ پاک

روضہ پاک نبیؐ دا سوہنا روح نوں دوے نکھاراں
روضہ پاک نبیؐ دا سوہنا بخشے چین قراراں

جسم نوں وی ایہ تازہ کردا قلب نوں پاک معطر
روضہ پاک نبیؐ دا سوہنا، نٹھیاں دوے ہزاراں

ڈالی پاک دروداں والی پیش اے ہر کوئی کردا
چنگا ڈھیر اے لایا اتھے چاہت والے ہاراں

پیار شفاعت والیاں سنداں اوتھوں لبھدیاں سبھ نوں
روضہ پاک نبیؐ دا سوہنا رکھدا وچ حصاراں

قربت پاک نبیؐ دی اوتھے سوہنی پیاری ملدی
روضے پاک نبیؐ دے ساہویں چمکن دل دیاں تاراں


نوری رشاں لے کے جاندے سارے ایسے درتوں
سبھ دے روپ سجائے اس دے سوہنے نقش نگاراں

جہڑا اس دے مکھڑے تائیں چمدا اکھیاں تائیں
روضہ پاک نبیؐ دا اُس نوں دیوے پیار بہاراں

ایسے لئی تے ایس دوارے نوری آنا چاہندے
روضہ پاک نبیؐ دا ویکھ کے ودھدیاں شان وقاراں

روضے پاک نبیؐ دے نال اے سوہنی مسجد نبوی
سوہنا باغ اے جنتی سارا ونڈے نت مہکاراں

اس دے وچوں نشیبو پھٹدی نور خزانے لبھدے
ایہ دنیا وچ رکھدی سبھ توں وکھرے نقش نگاراں



مسجد نبویؐ

مسجد نبویؐ ونڈدی پئی اے سبھ وچ پیار بہاراں
ایہنوں تکیاں دل وچ کھڑدیاں آپے ای گلزاراں

دل دیاں اکھیان کھول کے دیکھو ایہدے منظر سوہنے
نور و نور اے کیتا سبھ نوں ایہدے نور مناراں

اتھے سجدے آپؐ گزارے سوہنے پاک نبیؐ نے
ایہدی خشبو جنت ورگی دل موہون مہکاراں

روضہ پاک نبیؐ دا ایہدی سوہنی شان ودھاوے
پیار دا امرت ونڈ دیاں پپیاں ایہدے نور دیاں دھاراں

پاک مدینہ آقا دا اے پوری مسجد نبویؐ
ایہدی چاہت نور عقیدت دیوے نور نکھاراں

طیبہ دی گل چھڑ پئی ماکیاں اتھراں دے نال بھجیاں
مسجد نبویؐ ول میں تک کے اپنے بخت سنواراں

مسجد نبویؐ اندر باہر راحت ونڈی جاوے
مان ودھائے شان وی بخشے لیندی سبھ دیاں ساراں

اتھے جہڑے بردے آندے تانگھاں سدھراں لے کے
سوہنے آقا اوہناں تائیں کردے دان ہزاراں

شرفاں بخشے گنبد خضرا ایہدی سوہنی دکھ نوں
جنھوں تکیاں فرحت ملدی پائیے چین قراراں

.....☆.....☆.....

گنبد خضرا

گنبد خضرا سوہنا سوہنے رکھدا نقش نگاراں

گنبد خضرا سوہنا پاوے دل وچ ٹھنڈاں ٹھاراں

کیف تے مستی نال اے بھردا دل تے اکھیاں تائیں

گنبد خضرا سوہنا مارے حسن دیاں لشکاراں

حسن جمال نے تکیے اس دا نور دی بارش ہووے

گنبد خضرا سوہنا ونڈے سبھ وچ نور انواراں

ایہدے حسن دے جلوے نال ای ساڈے دل نہیں بدھے


گنبد خضرا سوہنا ویکھاں اپنے لیکھ سنواراں

ایہدے حسن تے جھاتی پاون عرشوں آن ملائک
گنبد خضرا سوہنا سبھ نوں دیوے شان وقاراں

دل نوں پیار تسلی دیوے، اکھ نوں پیار دا سرمہ
گنبد خضرا سوہنا سانوں بخشے نور پھہاراں

اپنے لطف دا سایا ایہنے سبھناں تھیں پھیلایا
گنبد خضرا سوہنا رکھے اپنے وچ حصاراں

سوہنے سوہنے سارے ڈٹھے میں فاران دے جلوے
گنبد خضرا سوہنا نجمی بخشے چین قراراں



فاران دے جلوے

آپُ دی رحمت شان وکھائی وسیاں دل دیاں باراں
 وچ فاران دے ہر پاسے ای ہوئیاں نور انواراں

آپُ دے نور نے بطحاء دے سبھ ذرے نور بنائے
 آپُ دے آیاں اتریاں سمھناں بھاگاں وچ گلزاراں

آپُ دی سوہنی ذات وکھائے سوہنے نور دے جلوے
 آپُ دے نور شفاعت کیتیاں جگمگ دل دیاں غاراں

آپُ نے جدوں منور کیتی آ توحیدی مشعل
 لپکے اوہدے ول پروانے بھاویں کھادیاں ماراں

آپؐ نے شرک جہالت تائیں ہتھیں مار مکایا
شر نوں دور نسایا اوہدیاں روکیاں سبھ یلغاراں

مے توحیدی ورتائی سبھ حق دے طالباں تائیں
جہاں جہاں پیتی پائیاں دل وچ ٹھنڈاں ٹھاراں

حق دا علم بلند چہ کیتا چڑھ فاران دی چوٹی
ٹھہر نہ سکیاں آپؐ دے سامنے جھوٹھ دیاں دیواراں

آپؐ تے لکھاں وار درود تے لکھاں وار سلام اے
آپؐ دے آیاں سوہنے آقا چمکیاں دل دیاں تاراں

دل چاہندا فاران دے جلوے رنج رنج کے میں ویکھاں
نظر کرم دی پاؤ تے میں انجے عمر گزاراں

.....☆.....☆.....

عمر گزاراں

لکھدا رہاں میں نعت مقالے انجے عمر گزاراں
تکدا رہاں اُس نور دے ہالے انجے عمر گزاراں

میرے پیار دا مرکز محور گنبدِ خضریٰ پیارا
گھمدا راں میں آل دوالے انجے عمر گزاراں

جہاں دیاں جنت توں وی ودھ کے اُچیاں شانناں
دیکھاں میں اوہ شہرِ نرالے انجے عمر گزاراں


تہاڈے ناں دی تسبیٰ کر دیاں میرا جیون لنگھے
اک اک ساہ انج کر اں حوالے انجے عمر گزاراں

آپؑ نے آکے جہڑا سورج آقاؑ روشن کیتا
اُس دے ویکھاں ہور اُجالے انجے عمر گزاراں

مینوں دیوو میرے آقاؑ اپنی دید دا شربت
بھر بھر پیواں پیار پیالے انجے عمر گزاراں

آپ دی مدحت والیاں نہراں انجے چلدیاں جاون
شعر میں لکھاں چمکن والے انجے عمر گزاراں

میرے آقاؑ پیار بہاراں وچ میں رہنا چاہواں
نور نگر دے ملن نوالے انجے عمر گزاراں



بخشو پیار بہاراں

مینوں اپنے کول بلاؤ بخشو پیار بہاراں
خاص کرم دی جہات اک پاؤ رکھو وچ حصاراں

ترس گیا واں ویکھن نوں میں آقا پاک مدینہ
اکھیاں دی ہن پیاس بجھاؤ پاؤ نور پھہاراں

تہاڈے ذکر دے چانن اندر میرا دم دم گزرے
دل میرے نوں انج رشناؤ کر دیو روشن باراں

امیداں دے دیوے بال کے میں راہواں وچ بیٹھا
میرے سارے روگ مٹاؤ پا کے کجھ جھلکاراں

جہڑی تھاں تے قدم مبارک سوہنے آپ نے رکھے
مینوں اُس دی دید کراؤ رکھو وچ گلزاراں

سرڈی بلدی میرے دل دی اس دھرتی دے اُتے
رحمت دا ہن مینہ ورساؤ میں وی سینہ ٹھاراں

اس دنیا دی دھپ دے نال میں اپنے آپ نوں لوہیا
میرے ستے بخت جگاؤ کرم کرو سرکاراں

اپنیاں دسیاں راہواں اُتے مینوں پا کے آقا
میری ہر اک تھوڑ مکاؤ بیٹری پار اتاراں

لوکی آہندے تیرا جذبہ اجے وی کچا لگدا
اس جذبے نوں امر بناؤ رکھو وچ دلداراں

میں چاہنا واں فراک واری سوہنا سفنہ تک لاں
جے کر تہاڈی جھات پوے تے وسن دل دیاں باراں

.....☆.....☆.....

سوہناسفنه

دکھ لیا اے سوہنا سفنه اکھیاں نے سرکاراں
تکنا اے فر آپ دا روضہ اکھیاں نے سرکاراں

ساوا گنبد وچ تصور سجیا اے ہر ویلے
پل پل ایہو تکیا نقشہ اکھیاں نے سرکاراں

رُت خزاں دی مونہ پرتا کے لنگھدی جاوے دوروں
دکھ لیا اے کھڑیا چبہ اکھیاں نے سرکاراں

پیار دا ہڑ وی توڑ کے بنے آیا باہر ہن تے
خورے کد دا ڈکیا رستہ اکھیاں نے سرکاراں

طیبہ والی نور فضا وچ جا کے چین اے ملنا
دیکھنا اے ہن سوہنا جلوہ اکھیاں نے سرکاراں

گونگے جذبے جدوں سلامی دین گے روضے اُتے
رو رو کے فر کرنا سجدہ اکھیاں نے سرکاراں

سوہنے منظر طیبہ دے سبھ دیکھنے نہیں ہن ایہناں
کرنا رو کے ٹھنڈا سینہ اکھیاں نے سرکاراں

ربیع الاول پاک مہینے دینی پیار سلامی
روشن کرنا خواب دریچہ اکھیاں نے سرکاراں

.....☆.....☆.....

ربیع الاول

ربیع الاول پاک مہینہ ونڈے پیار بہاراں
سر متھے تے چایا لیہنوں آقا دے دلداراں

ایہدے آیاں نخبو دے سامان اکھے ہون
سیرت ، نعت دے میلے لگن گلیاں وچ بازاراں

پیار دیاں سوغاتاں نال ایہ سبھ دے دامن بھردا
خلق دی نخبو انج ورتا دے اٹھدیاں نیں مہکاراں

رحمت والیاں واواں چلن دکھ تے درد مٹاون
رل مل سبھے نخبیاں بوون کھڑدیاں نیں گلزاراں

روشنیاں دے پھل ورتاندے بدل پیار دے چھاندے
سوہنا سوہنی رحمت گھل کے ونڈے نور پھہاراں

دل تے روح نیں نئشی دے پاروں مستی دے وچ آوندے
ایہناں تائیں ملدیاں رہندیاں ہر دم چین قراراں

نال نبیؐ جو چاہت رکھدی ہر اک جان اے راضی
جشن میلاد مناندے جہڑے نئشیاں پان ہزاراں

سوہنیاں نوری گھڑیاں دے ای صدقے سوہنے آقاؐ
جہڑیاں منگاں نیک دعاواں پاون شان وقاراں

سبھ نوں نور و نور اے کردا جشن میلاد نبیؐ دا
سبھ نوں نور دے ہالے رکھن پاک نبیؐ سرکاراں

.....☆.....☆.....

پاک نبی سرکاراں

عشق نبی دی دولت چاہواں پاک نبی سرکاراں
 ہر دم نور ہدایت چاہواں پاک نبی سرکاراں

دل دیاں اکھاں کھول کے رکھاں ایس لئی ہر ویلے
 آپ دی پاک زیارت چاہواں پاک نبی سرکاراں

طیبہ دے اوہ رنگ سجیلے اکھیاں دے وچ پھر دے
 تکنا فر اوہ جنت چاہواں پاک نبی سرکاراں

تھاڈی چاہت ' پیار محبت سوتنی قربت خاطر
 کجھ گھڑیاں دی مہلت چاہواں پاک نبی سرکاراں

صل اللہ دا کراں وظیفہ جد تک موت نہیں آندی
ایس عمل لئی فرصت چاہواں پاک نبی سرکاراں

خاک بناں میں آپ دے در دی آقا مدنی ماہی
مل جاوے ایہ عزت چاہواں پاک نبی سرکاراں

وچ بدر جو ونڈی آپ نے اپنے وچ اصحابہ
امت لئی اوہ نصرت چاہواں پاک نبی سرکاراں

آپ ملے تے ملیا رب توں سوہنا نور خزانہ
آپ توں آپ دی رحمت چاہواں پاک نبی سرکاراں

جھولی پا کے نیک دعاواں پاک دوارے آیا
تہاڈے پیار دی نعمت چاہواں پاک نبی سرکاراں

.....☆.....☆.....

دعاواں

سبھ توں پہلاں ہار سلام دے پھل درودی واراں
فر میں پیارے آقا اگے رو رو عرض گزاراں

کملی والیا شاہا ، مینوں کر کملی دے اوہلے
وانگ بلاواں ظالم دشمن کھوندے چین قراراں

ترلے، ہاڑے جھولی پا کے آیا پاک دوارے
میرے اکھراں نوں رشنا دے رواداں زار گزاراں

اُمت دا جو حال اے ہويا اوہ نین لکيا تہا تھوں
گمراہی دے ولے ٹریاں ایہدیاں فکر افکاراں

استمدادی طاقت ایہنوں اپنے جال اچ پھایا
ایسے لئی تے ایہدے اُتے پیاں نیں پھٹکاراں

اندروں وی بے حال اے کیتا استحصالی ٹولے
اپنا آپ جدوں وی تکیے آندیاں شرماں عاراں

ساڈے اپنے دشمن بن کے سانوں ای پئے مارن
رہبر بودے ظلم کماندے بہہ کے وچ کچھاراں

اسیں زوالاں اندر ڈگے آپ دا اُسوہ بھل کے
درد سمندروں کڈھ کے سانوں لے لئو وچ حصاراں

بے عملی بے شرمی والی دلدل وچ آں پھسے
سوہنے آقا بخشو سانوں عزت دیاں دستاراں

اپنی پیاری نعت دے صدقے بخشو اوگن ساڈے
جہات کرم دی پانکے آقا کر دیو نیک اطواراں

امن دی بھکھیا منگدے میرے رت بھنے ایہ اکھر
ایہناں اُتے رحمت تہاڈی پاوے نور پھہاراں

بے ہمتے بے آسے سانوں نااتفاقی کیتا
روگ گوا دیو ساڈے دل دے پائیے ہن چھٹکاراں


چیلے اج شیطان دے بن گئے یورپ تے امریکہ
ایہناں تائیں ہوں آقا ہر میدانے ہاراں

پاکستان دے اندر آقا پھر جائے وا ہن ایسی
ہر پاسے ای چلن اتھے عدل دیاں پرکاراں

ایہ قرآن اعجاز تھاڈا ساڈے کول اے جہڑا
عالم سانوں کر دیوو ایہدا بخشو نور انواراں

ساڈا سر بند جڑ جاوے جے نور قرآنی تائیں
فیر کفر دے نیھریاں اندر کر دیئے چکاراں

آقا سوہنے آپ نے میرا بھرم سدا ای رکھیا
ایسے لئی میں بناں سواں بخشش دے درباراں



(تعارفی خاکہ)

نام محمد اقبال نجمی ولدیت محمد اسماعیل تعلیم ایم اے (پنجابی)

تاریخ پیدائش 4- جنوری 1953ء جائے پیدائش مدر چک - پتوکی

پتا 88- بی سیٹلاٹ ٹاؤن گوجرانوالہ فون: 055-3251603

ڈائریکٹر فروغ ادب اکادمی - پاکستان

صحافتی خدمات چیف ایڈیٹر مجلہ ”مفیض“، ”دلچسپ“، ”جام صحت“

ایڈیٹر ساحل انٹرنیشنل ڈنمارک

پنجابی تصانیف

1985ء	سیرت حضور ﷺ دی	1983ء	عمروں و ڈے ڈکھ
1987ء	دھرتی میرامان	1985ء	ٹم ٹم تارے
1988ء	سچے موتی	1988ء	کھڑدے پھل
1989ء	ایہ نہیں میرا پاکستان	1989ء	تن وستی وچ درد بلاواں
1993ء	شکرانہ	1989ء	سک دی ڈالی
1995ء	محاوراتی غزلاں	1992ء	مہکاں و نڈدے بول
1998ء	سمے دا بھار	1997ء	اپنا اپنا فرض نبھائیے
2007ء	نوری ریشماں	2001ء	حمد چراغ دلاں دا چائن

اردو تصانیف

1984ء	ہم کلیاں ہم تارے	1984ء	قدم قدم آباد
1984ء	سارے دیے جلا دو	1984ء	تتلی بچہ پھول
1987ء	پھول اور بارود	1987ء	سوچ کے زاویے
1990ء	نعتیہ ہائیکو	1988ء	آپ ﷺ کی باتیں
1991ء	آزادی کا سفر	1991ء	گوجرانوالہ کے اہل قلم
1998ء	شوکت واسطی فن و شخصیت	1994ء	پاکستانی آزاد غزل
2001ء	دل نہیں مانتا	1999ء	اجازت
2003ء	خیرات مدحت	2003ء	میری آواز
2005ء	نغمہ محمد	2003ء	Angels of Thought
2006ء	پھول کھلتے ہوئے	2006ء	زرگس کے پھول

نعت اوہ خوش قسمت تے بلند بخت صنف اے جنہے ہر دور، ہر عہد، ہر زبان تے

ہر صدی دے شاعران توں تاریخ داسب توں اچّا خراج عقیدت حاصل کیتا۔

نعت ہر ہیت، ہر ترکیب تے ہر اسلوب وچ چودہ سو سال توں زمانے بھر دے

سخنوراں دی ادبی، شعری تے نظریاتی صلاحیتاں دا بہترین محور اے۔ ایس تناظر وچ صرف قصیدے دی

صنف نوں ویکھئے تے نعت عربی، فارسی، اُردو تے پنجابی دیاں شاعران کولوں اوہناں دے عشق، عقیدت

تے فکری وابستگی دے کدی نہ مرجھان والے گلڈستے وصول کردی نظر آؤندی اے۔ حضرت حسان بن

ثابت تے کعب بن زہیر دے حجازی ماحول توں اج دے پنجابی نعتیہ قصیدہ نگار محمد اقبال نجھی دے قصیدہ

نعتیہ ”نوری رشتاں“ تیک کنے قصیدے ذہن تے فکر دی الہم دی زینت بنے ہوئے نیں پر جگہ دی تنگ

دامانی سانوں فقط ”نوری رشتاں“ دے انوار دی بارات سجان دا اشارہ کر رہی اے۔

محمد اقبال نجھی دا نعتیہ قصیدہ نوری رشتاں محبت رسول ﷺ دا منہ بولد اثبوت اے۔ جہدے لفظ لفظ

چوں محبوب کائنات ﷺ دے لافانی خصائص و کمالات، آپ ﷺ دی نورانی صورت پاک، لازوال

بیرت، عرب دے صحرائیںیاں نوں قیصر و کسریٰ دے مقدر داما لک بنان دی بندہ نوازی، رحمۃ اللعالمین،

شفیع المذنبین، ولادت باسعادت، عشق و سرمستی تے ذوق و شوق دی فراوانی اسم محمد ﷺ دیاں برکتاں،

عرب دی بنجر زمین تے رحمت دے گلاب کھڑان والا انقلاب قرآن مجید دا ہمیش زندہ رہن والا پیغام

”نوری رشتاں“ بے شمار عنوانات نال مزین شاہِ حجاز دے عشق دی اوہ تاریخی دستاویز اے جہڑی ہمیش تیک

محبت رسول ﷺ دے رستے تے چلن والیاں لئی سنگ میل دا کم کردی رہوے گی۔ ایہ نعتیہ قصیدہ بنیادی

طور تے غیر مردّف اے پر کجھ اشعار دا شعری حسن مردّف ردیف نال وابستہ اے۔

ایس نعتیہ قصیدے دا اک ہنور وادھا درجناں حدیثاں دا پنجابی وچ او سے ای بھرتے قافیے وچ

ترجمہ چل رہیا اے۔ حدیثاں دا ایہ نوری پراگا محمد اقبال نجھی دی بلند خیالی، پاکیزہ فکر، گہرے مطالعہ تے

روحانی سوز دا زندہ ثبوت اے۔ آکھن نوں تے بندہ فانی اے پر رسول ﷺ دے نوری ناواں نال وابستگی

ایس فانی انسانی دے سرتے لافانیت دا تاج نکا دیندی اے۔ سانوں اُمید اے پئی محمد اقبال نجھی ہوراں

”نوری رشتاں“ وچ عشق محمد ﷺ دی ازلی تے ابدی شان دے جہڑے ستارے کھلا رے نیں اوہ سدا ای

ایہناں لئی بقائے دوام دے دربار وچ جگہ پان دا باعث بن دے رہن گے۔ ایس عزم نال

آپ توں آپ دی رحمت چاہواں پاک نبی سرکاراں

718

پروفیسر محمد اکرم رضا